




MARCH 2024

VOLUME 64 | NO. 03

Khristian Thukizakna



SIHNA A PAN
HINNA THAK

24 PALM SUNDAY

29 GOOD FRIDAY

31 EASTER SUNDAY

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndouliau

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

Lakman:- Kum khat ₹ 150.00;
Dak ah ₹ 200.00; Bu khat ₹ 15.00;
Gamdang US\$ 20.00

CONTENTS

1. EDITORIAL	: 01
2. BANGZIKA JESU VUALZOU A LUT KICHI HIAM?	: 03
3. JESU SIHNA SIHNA MANPHA	: 07
4. JESU THOHNAWNNA	: 11
5. INNKUAN KIPUMKATNA	: 16
6. KHRIST TOH KIPUMKATNA	: 21
7. BIBLE STUDY	: 23
8. GAMMIAL AW	: 28
9. CHILDREN'S CORNER	: 34
10. EBC INNSUNG THU	: 36
11. ORDAIN SUNNA	: 38
12. KIPATHU GENNA THUMNA MAKAI	: 39

Thusuah ding piakna:

Editor,
Khristian Thukizakna
Dorcias Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan ahi kim kholkei.
Thusuahte'n amau thusuah ah moh a
pawtek ding uh.*

INKUAN KIPUMKHATNA

Ngai in, unaute kituak diamdiam a omkhawm a nak hoih in, anuam mahmah hi (Sam 133:1)

Tukha a i thupi uh Inkuan Kipumkhatna thupi lungluthuai mahmah khat ahi. Thumal nih 'inkuan' leh 'kipumkhat' kigawm ahi. Inkuan kichi mihing tengteng kipat khiakna ahi. Inkuan sung tuh michih a dia khovel masa ahi, chih tuh khovel kichi bang ahia chih thei dia i hong kalsuan lut masakna ahi. Huaiziakin, inkuan tuh khovel i muh masak pen ahi. Inkuan sung ah khovel bang ahia chih anuam leh ahaksa maituah dingdan i hon sintou a, i School masa ahi leng a chih theih hi. Hiai school ah thumanna, mahni ki thununna, paukam leh omdan kilawm, kuhkalna, mahni kitoudelh thei hi ding a kisinna, tup nei a hin ding dan khawng isin masa uhi.

Inkuan khenkhat college chih phet hilou university bang in thudot tham, belh tham mihing bawlkhiakna ahi uhi. Inkuan khenkhat bel school hoihlou, primary school tan aban sinna ding om nawnlou toh kibang leng om ding hi. Huchi mah bang in inkuan khenkhat biakin neu zaw bang a Pathian theih masakna, Pathian zahtak leh a nasep ngaihsangna inkuan ahih lai un, inkuan khenkhat hotel bang lel nekna leh dawnna, akhente zu inn 'bar' bangmai a kikhahzan inkuan leng om hi.

Inkuan school toh i tehkak vanglak a genbeh lai leng: Principal (enkaitu) anei hia? Sinlai curriculum (inkuan kikepna dan) kichian aom hia? Class (inkuan kisinsakna) regular takin a om hia? Na school ah discipline a om hia? Student attendance (inn a om hun leh pawt hun) aki enkai hia? I school apan school danga admission zongte'n admission amuzou sek uhia (tate khotang a ahong lut Chiang un khotang kipaiph ahi uhia?) Na school apan graduate te'n competitive exam hiam interview te ah bang achi ua (tate khotang a zat dia etlah tham ahi uhia?). Na student-te'n biakna a ngaihsak uhia? Pathian nasep a ngai thupi uhia?

Tulaia school hoih i ngaihpomoh bang un Pathian in leng inkuan hoih a ngaihpomoh hi. Huai inkuan hoih chiamtehna khat tuh ‘kipumkhatna’ ahi. Tua kipumkhatna Bible gendan in ‘Kha a kipumkhatna ahi’ chih ahi (Eph 4:3). Tua kipumkhat bel lemna in a kankhawmna sung a Pathian Kha nasep tungtawn a kipumkhatna ahi. Huai mah ahi Bible in “unaute kituak diam diam a om (ten) khawm anak hoih in anuam mahmah achih kha. Hiai kipumkhatna in alou theilou a ahuam khak ding hiaite ahi.

Nupa kal: Nupa kal kilem leh kipumkhat tuh inkuan kilamtouhna ding a a suangphum ahi. Aziak, inkuan kipumkhat kichi siamna degree hiam hauhna hiam a kinga hilou hi. Bible in agen kipumkhatna pen Kha khat a kipumkhatna ahi. Nupa kipumkhatna leng tua Kha a kinga ahiah ding ahi. Nupa kal chidam in insung chidam a bawla, insung chidam in lemna leh muanna atun a, lemna omna ah hinna kipumkhatna piang hi. Hiai kipumkhatna tuh tulaia siatnate; zu leh sa leh khamtheihite, kihuatna leh kimelmaknate’ hihsiat theihlauh Kha ziak a kipumkhatna ahi.



Unau Kipumkhatna: Tulai khoveng khangtou zel ah ‘nuclear family’ kichi nu leh pa toh a tate uh omna inkuan aki uang gen hi. Pitek putek neite bang in old age home khawng ah vakoih khe mai uhi. Inkuan akigen chiang in mahni zi leh tate genna hong suak haihiahi ta hi. Koisan hiam pi leh pu omte, ni-le-gang, sanggam dangte tuh inkuan mite dan ngaihlouhna khangthakte lakah lian haihiahi bangin kilang hi. Tua toh kiton in pianpih sanggamte toh kizopna kol (loose) haihiahi hi. Tulaitak i society uh i et leh nu leh pate om nawnlauh nung a sanggam dangte’ tate toh kikawm nawnlou phetlou a kitheituah nawnlou ding hunkhop om ding in kilang hi. Bangziak hiam i chih leh, khangsawnte ki-ittuah ding a panlakna pomoh salou nu leh pa tampi omta hi. I society kisia i chih sek uh konglai khawng a hong kipan ahikeia, inkuan a u leh nau kala ki itna, kipumkhatna i mansuah ziak uh ahi. Laiguizomte bawn itlou a gamlapi mite it ding thil haksa ahi. Huaiziakin namsung leh khosung a ki-itna leh kipumkhatna omsakna dingin inkuan kipumkhatna mah pomoh masa hi. ■

Palm Sunday Message

BANGZIAKA JESU VUALZOU A LUT KICHI HIAM?

~ Rev. G Thangsanglian, *Guwahati*

1. Thumasa: Thunuailut tak a Sabiltungnou tung a hong tuang Kumpi Jesu min in 2024 Palm Sunday chibai ka hon buk hi. Saptuamten kum teng a ni poimoh zatlough theihlough a i koihte uh lak a khat ahiehleh Palm Sunday ahi. A poimoh ziak mah in, Jesu hinkhua a thiltung, Tanchinhoih bu li(4) teng a kigelh tamlou chik omte lak ah Vualzou a Jerusalem a lutna leng telkha hi (**Matt. 21:1-17; Mk 11:1-11; Lk. 19:28-40; Jn 12:12-19**). Hiai in Palm Sunday kichi gingtute adia gennei leh chiamteh thamching thiltung ahiehban ah leitung a Jesu nungzuite tengteng a ding a ngaihneu theih hilou ahihdan hon musak hi. Palm Sunday bel Jesu' leitung a a nasepna nunung pen ni sagih, Gimthuakna Hapta (Passion Week) chi a kigen zel, a kipatni chiamtehna ahi. Palm Sunday bel leitung a Jesu' nasep tawp ding kipatna leng ahiehman in poimoh mahmah hi. Jesu leitung a mikhialte tan (**Lk 19:10**) ding a hongpai lai a khatvei sunsun pahtawi a a om ni leng ahi.

2. Palm Sunday Kipatdan: Palm Sunday ahiehleh Kum Zabi 3na tawplam vel in Jerusalem a om Saptuamten ana zang pan uhi. Huai hunlai in mipiten khopi sung a munsiangthou kichihna munte a vapai in lasa, thum leh Laisiangthou sim in hun zang uhi. Huaite a zoh ahiekhith Chiangin, Jesun nungzuite apaisanna mun Olive tang ah, Jesu vualzou a Jerusalem a lutna bible tang

sim in, khomial ding kuan Chiang in, mipiten khopi lam manoh a pai in "Toupa min a hongpai a hampha" chiin na zangzel uhi. Hiai paidan Kum Zabi 6na leh 7na tan sutzop ahiehning in, Kum Zabi 8na ah kipan in nitak lamzuih pen zingkal lamzuihna a khek in om hi. Jesu Vualzou a Jerusalem alutni a mipiten tum nah toh ana vaidawn uh ahiehman

in hiai ni Palm Sunday chi a Saptuamten I zat uh ahi.

3. Palm Sunday Bang

Hihiam: Palm Sunday kichi Jesun leitung a anasep ding tengteng a zohkuan a vualzou a Jerusalem a lut chiamtehna a kipahna ni a kumteng kizangzel genna ahi. Hiai ni a Jesu vaidawwna toh kisai Tanchinhoih bu lite a kintak a kimu ahihman in nungzuite nih sawl a omte, Jesu tuanna sabiltung nou, tum nah chihte leh mipite thilhihte saupi in I sutsawm kei hi. Himahleh, I taklat nop ahihleh Palm Sunday ni a Jesu paina ding a mipite vaidawn dan a pan leh a thilhihte ua apan in Judate suahtakna leh zalenna lunggulh mahmah uh ahi chih muhtheih in om hi.

4. Judate Lamet dan: A poi mahmah ahihleh Judate lametna leh lamet taka a vaidawnpa uh deih leh tup a kibatlouh ahi. Mipiten a vaidawnpa un simleivai a hotkhiakna leh nam zalenna pedia a lunggulh lai un Aman a khalam a hotkhiak ding a tup ana hizaw chih I muthei uhi. Judate lamet dan leh a lametpa uh thiltup a kibatlouh ziak in

Hossana chi a pahtawina awtuh (**Matt. 21:9**), Kros ah kilhden in chi in hamsiatna aw a hong suak maimah hi (**Lk.23:21**). Kei messia ka hi kichi tampi ana omta, lamentak a ana zuihte un a lohsappih nung ua, Messia taktak a nawlkhinkhak uh Judate a ding a thilpoi mahmah ahi. Messia hihna taktak theihlauh poi ahihman in, Pathian ei deihdan, i taksap, leh i lunggulhte ban ah i gimthuaknate apan hon panpih ding tanlel a Toupa a etkhak lauhuai ahihdan hon musak hi.

5. Bangziak a Vualzou Kichi Hiam?: Jesu'n Kross a thuak ding thuak nailou, mikhialte sik a a hinna a luikhiak ding leng luikhe nailou ahihlai a bangziak a Vualzou a Jerusalem lutna chih a om hiam? chih saulou in sutkhawm leng ichi hi.

5.1 Jawlnei Thugenkhoh

Tangtung: Jawlnei Zakaria in kum 450-500 ma in Jesu Jerusalem a Kumpi a lut ding ahihdan ana genkhol khinta hi (**Zak. 9:9-10**). Zekaria in Jerusalem a Jesu vualzoutak a lut ding ahi chihtan kia lel genlou in, bangchi bang a lut ding, bang zang a lut ding

chihte kiteltak in ana genkhin hi. Zakaria in Jesu, leitung kumpite hih ngeina dan bang hilouin sabengtung zang a lut ding ahihdan ana genkholh tangtunna leng ahi. Jesu vaidawanna ah, Juda mipiten a thilhih tungtawn un Jesu hihna phuangkha ua, Toupa Jawlnei genkholhte dik chih I thei uhi. Jesu toh kisai Jawlnei Zakaria genkholh tengteng a vek sipsip a tangtung vek ahihman in vualzou ahihna kichian mahmah hi.

5.2 Jesu Messiah leh Kumpi Hihna Puankhiakna: Jawlnei Zakaria in Jesu sabiltung nou tung a tuang a Jerusalem lut ding ahihdan ana genkholh chih I theita uhi. Hiai in a tuppipen ahihleh Jesu Messiah leh Kumpi ahihna puankhiak ding chih ahi (cf. Sam 118:7, 17, 19, 22, 26). Laiiangthou sutmiten Thukhun Lui leh Thukhun Thak kikal a kum 400 hunsung in **messia** kichi tampi petmah hong piangkha chi uhi. Kei **messia** ka hi kichite khat mahmah leng a dik omlou in, sawt daih leng omlou in mangthang pahzel uhi. Hiai bang a mipiten Pathian' thuchiam, Messia hongpai ding chih lametna liantak toh ana ngak hun uh ahihman in Jesu

a dinga hunbi hoih a hong suak hi.

Tanchinhoihte ah Jesun damloute a hihdam chiang hiam, thillamding ahichiang in midangte kianga genlou ding in theisak zel hi (**Matt. 9:30; 12: 16; 16:20; Mk. 1:43-44**). Himahleh Jesu Jerusalem a lutni a Pharisai khenkhatten, Juda mipi Amah vaidawn a kikoute khou dingin sawl mahle uh, Jesun, "Hiaite a daih uleh suangte bek kikou ding uh" chi in dawng hi (**Lk. 19:39-40**). Hiai a Jesu dawnna a kipan in ahihna ki-im nawnlou a, ahihna puangzak ding mihing a om kei leh leng suangte kikou thouthou ding uh a chi hi.

Jesu hongpai na thuguk mikhialte tan ding ahi chih Matthai in, '*...mitampite tatna dia a hinna pe ding a hongpai*' ahihdan taklang hi (**Matt. 20:28**). Toupa hun hongtungta ahihman in Juda mipite mai a Messia ahihna puankhiak ding tup a ompen lohchingtak a puangkha ahihman in vualzou a suak hi. A puankhiak kia mai hilou in, Jerusalem a vualzou a lut ding chih genkholhna tangtun ahihleh Luguh Mun (Golgatha) mun a sihna a mai

tuah ding leng tangtun zou ding chihna leng hong hi hi. Huaiziakin, Jesun a hong paina ziak phuankhiak ding a tup bangbang a lohching ahihman in vualzou mah ahi hon chisak hi.

5.3 Gal hilou in Lemna: Jawlnei Zakaria in Kumpi hongpai dingpen in, “*namte kiang ah lemna thu a gen ding*” chih ana genkhol hi (**Zak. 9:10**). Kidouna hiam, gal hiam tungsak dinga hongpai hilou ahi chih a Chiang hi. A tuppen ahihleh mihingte leh Pathian kikal a lemna tut ding chih ahi (**Eph. 2:13-16**). Huai lemna tungding dingpa tuh Jerusalem a lut in Kumpi kidouna a kalsuan dia kisa sakol tunga tuangte bang hilou in kingainiamtak in lemna tungding dingin sabiltung nou tung ah tuang in a hongpai hi (**Zak. 9:10**). Kross a a sihna ziaakin Pathian toh kimelma himahle hang Jesu ziak a lemna tungtawn in lawm leh ta hihna I tang uhi (**Zak. 9:10**). A suangphum, Kross a a sihna a sep ding teng leh a sihziaka kilemna om ding chih lakkhia zouta ahihman in vualzou ahi hon chisak hi.

Himahleh, i Toupa hong pai nihveina ah, a hongpai masak a sabiltung hinawnlou in, sakol ngou tunga tuang in hongpai suk nawn ding chih kilakna ah i muthei hi (**Kil. 6:1**). Huaiziakin, Jesu ziak a Pathian toh kilemna i neih poimoh mahmah ahi chih phawk thak chait ni.

6. Thukhitna: Gospel laibute ah a tangte ah I thupi kimuchet kei mahleh a thupi ding in zang chiat uhi. Hiai gen nei ding ahi chih hon ngaihtuahna hongpiak dawonna a tunga itaklat louh le a omthei lai ding hi. Lungsim hon khoihkha mahmah ahihleh sep ding bawl ding zounailou a vualzou chih thillamandang khat ahi. Hiai in Jesu leh Pathian chituamna kilangsak hi. Vualzou a zou zel dingpa neite i hihkhak zenzen nak kipahhuai hina maizen e hon chisak ahihman in, hiai bang hamphatna khahsuaah louh teitei i sawm chiat ding uh. Leitung dan ah vualzou i chihte leh vualzou dia i koihte tuh thahatna a neite, thilhihtheihna haute, galvan haute leh lawm-le-vual haute ahi. Himahleh tutung a i theihthak dia poimoh mahmah ahihleh kingaihniamna ah

kinga ahi chih Jesu omdan apan phawk thak chiat ni.

Ban ah, tu chiang in gal piangsakte sang in, gal hiam buaina vengsak thei mi hiam pawlpi tuh mite ngaihsan leh ngaihthupi ahi. Hiai mah gingtute tup leh ngim thupipen ahah gige ding ahi. Mimal,

inkuan leh pawlpi sung ah leng Jesu nungzui ihihna phawk a buaina lianzaw hiam siatna thupi zaw hiam kikhenna tungsaktu hizawlou a lemna leh kitheihshiamtuahna tungsak tu hih I zuihpa deihdan leh a tup thupipen ahi chih phawk thak chiat ni. ■

Good Friday Message

JESU SIHNA SIHNA MANPHA

~ Rev. Dr Thangminlun Mangte, *Field Superintendent, HMF*

"Jesu aw ngaihtak in a kikou a, "Pa, na khut ah ka kha kon kemsak hi" a chi hi. Huai a chihzoh in a kha a khahta hi (Luke 23:46).

~ **John Piper** [*Pastor leh Laisiangthou sutmi*], *Kros lampi gimthuakna lampi ahi a, khovel in Khrist itna a muhna ding ua thattu hilou a sihna toh Khrist pesawntu ahi.*

Thupatna: Khristian Thukizakna simtu deihtak Toupa Jesu min in Chibai aw! Pathian apan deihsakna heutute tungtawna ka tan, Toupa Jesu sih champha **Good Friday** kha ah hiai thu gelh ding hamphatna piaka ka om man in Pathian leh heutute banah simtute tungah ka kipak mahmah hi. Hiai article saulou tungtawna nang leh ken Toupa vualzawlina i tan ding deih in thumna toh latkhiak ahi.

1. Jesu matna leh Sawina: Khoksakna bei khovel ah vaihawmna dika pai ding hileh mohpaih a omlou ding Toupa Jesu, thudik sikdena ziakin

mohpaih leh sawi in om hi. Gethsemani huan ah, zuausan pa Judas leh siampu liante, laigelh mite, upate leh mipi namsau leh khetbuk tawiten (Mk 14:43) ava

man uhi. Kaiapha sungpha Ana kiangah pi masa ua, huai zoh, siampulian pen Kaiapha kiangah a pi uhi (Johan 18:13). Huai teng hun salou in, zingkal in Romete Governor Pilat kiangah pi in om a (Johan 18:28 ~ 38), himahleh aman “*Bangmah a gitlouhna ka mu kei (Johan 18:38; 19:4)*” chi in Herod kiangah a sawla (Lk 23:7), Herod in thu tampi ana donga, himahleh bangmah a a dawnlough ziakin Pilat kiang ah sawlkik in (Lk 23:11), Pilat in thudik a vaihawm sanga Kaisar lawm hih a utzawk ziakin (Johan 19:12) leh mipite nget bang in, Jesu a utut uh loh ding in a pekhe ta hi (Luke 23:25b; Johan 19:16). Hiai toh kisaikha thil thumte:

i) Thudik Zuilou Heutute: Jesu Khrist mat ahihlai in Juda ten heutu, thudik gum ngamlou nei uhi. Kumpi Herod, siampu lian Kaiapha leh Rome vaihawmtu lian Pilat in amuh uh thudik huai hun taka gum ngam hile uh, thudik vualzou ding hi. Himahleh, mahni ang masial, thudik gumlou heutu a neih ziak un, thudik a vaihawm Toupa a mohpaih ua, a taksa kia gawt a hihlum thei ahihlam uh a theikei lai uhi. Vaihawmtu ten mipi te thu le la deihdan donga,

kitheihpih hoihlua ahihlai in thudiklou diklou chi ngamlou, gelh leng gelh ngamlou zuih bikhiah neilou heutu neikha Judate hehpih huai mahmah uhi. Simtu deihtakte, i mimal, nupa, saptuam, khotang leh simlei vai ah i tuahte leh phut lel te ngaihtuah le, Pilat leh huailai a heutu om diudeute banglel heutu neikha i hi diam? Heutu dinmun a dingte leng ki ngaihtuah poimoh mahmah hi.

ii) Pum phur Mipite: Juda mipi ten a mi matpa uh, dikloua angoh pa uh, kua ahia chih thei a zong khe ding in pilvanglou uhi. Huainak sangin, amau meltheih leh deihsak Barabba khakhkiak ding telzaw uhi. Tangtawn thil lam himhim ngaihtuah banlou in, huai hun laitaka a poimoh leh a buaina uh ngaihtuah nak sang in, tomchik sung ngaihtuah in buai ua, a heutute uh nahoih sem ding in tawsawn lou uhi. Ei le ki ngaihtuah le, huai hun laia mipite bang i hi kha uhia? Election ah, mipi movement peuhmah ah kha le sa a heutu dinmun khat peuh ah lawmpa/ nu tanau beh le phung pai a buaina chikim phial phu toutou lai ding i diam? Tua i thuak haksatna, khang sawnte

tan dia deihsak lai ding i diam?
Mipite ki ngaihtuah hun ahi.

iii) Dikna Genlou Jesu Khrist:

Toupan zaw amah zuausan, dema, gawt leh satte tan in a theisuak vek hi. Huaikia lou in, thusia leh gitlough nasep hihtum a aki sakguk uh thei hi. Himahleh a sia le pha theihna uh zang ding in koiha, ki gensiang thei na pi akam a ka kei, dik hinapi nang leh kei ziakin diklou tansak himahleh, ahi adiklou tuan kei, "...*khelhna himhim theilou amah Pathian in eite ziakin khelhna in a bawl hi (2Kor 5:21)*. A pumpi asawi ua ana mahmah ding. A hon it ziaka thgak teitei in athuak mualsuah hi. Unaute, i Toupan ei adia ana thgakthgak lai ahihkhak ding lauhuai kasa. Bangzah vei na heutu hihna ah pikawi in na om a? Bangzah vei nang angmasial ziakin Jesu Khrist na thgak saka? Tuni in i Toupa Jesu na heutu hihna leh vaihawmna mun ah hongpai henla, mipite leng i mipi hihna laka hongtel hileh, bang hon genkhum dingin na gingta a?

2. Jesusih Ziaka Hamphatna:

(i) Herod leh Pilat kihoutheih loh (Lk23:12) ~ Ana kihou theilou Herod leh

Pilat Jesu ziaka ki houthei chih Laisiangthou in gen hi. Khrist Lemna Lal ahih chetna hoihtak ahihman in Laisiangthou dikna a chian semsem hi. Huai bangin, nang le kua hiam na houpih noplouh, na hehsan vilvel khat toh kal lemtu in Jesu pangsak in.

(ii) Barabba suahtakna

(Lk 23:18, 25) ~ Khrist sihna mikhialte a dinga suahtakna ahih man in, Jesu mat leh vaihawmsak ahih lai in, mikhial siamlouh tang, Barabba in suahtakna ana tang pah hi. Jesu Khrist thgakna hamphatpih masa pen ahi mai ding e.

(iii) Kros tunga Mikhial Hotdamna (Lk 23:43) ~

Mikhial mangthang dingte hinna pe dinga hongpai ahihna semzom zel in, Kros tung ah mikhial Amah toh kilhbelh a om khat in hamphatna thupitak a tanga, hampha petmah hi. Kros tung ah kilhbelh khawm in om kha kei le uh, hiai hamphatna a tangkha de aw? chih ngaihtuah huai pi ahi. Zalen taka hun a zat theih lai in, Jesu apan hotdamna lamet leh lunggulh a aneih ding gintak huailou hi. Huaimah bangin, nang le

na tulel dinmun toh, haksatna omlou, zalen taka hotdamna natan theih kei lai leh, nang hondou a na lungsim hon kam, khaatna, kisaktheihna leh ki diksakna tengteng Khrist toh kros ah kilhden in om mah dih, na hampaha zaw ding hi.

(iv) Sepaih zaheutupa'n Pathian phat (Lk 23:47) ~ Khelhna pua, Kros a kilhden a om Jesu vengtu sepaih zaheutupa'n, a mohpuakna hoihtaka sema aom lai in, mikhialte a dinga si Jesu Khrist a muh lel in leng a hinna kikhek zou hi. Kros tunga mikhial kia genlough, khelhna neite gawttu leh vengtu pa ngei in Pathian thupina mu in, chikmah a Pathian phat ngeilou pan Pathian a phat theita hi. Nang leng na hamphat pih taktak na ding in Jesu na etdan khek inla, muchian taktak le teh, na hinna ah Jesu phat leh pahtawi in a om mai ding hi.

(v) Mite awm kitum a kik uh (Lk 23:48) ~ Albert Barnes [*Laisiangthou sutsiam*] in, *Jesu Khrist kilhden a aom lai, en dinga hong paikhawm mipi ten, thil omdan a muhtak un, lamdang sakna a ki dim in, vaihawmtute hihkhleh ziaka*

Pathian apan gawtna hong tung ding ngaingam lou in, launa toh poisa petmah in a awm uh kitum a kik ahi uh chi hi. Jesu Khrist hihna theilou mipite, theihthak leh muhthak toh inlam kik uh ahihman in a hampaha uhi. Nang le, hiai te banga kisik a awm kitum a Toupa kiang na zot naikei leh, den Chiang in a zekai lawkha ding hi.

(vi) Jesu sisan ziaka Mikhial nang leh kei Suahtakna (Rom 3:24f; 5:6) ~ Jesu kilhden laia telkhalou, nang le ken i hamphat pih theih na dingin Pathian in lampi hoihtak sialsa in honna koihsak hi. Huai hamphatna bel, Krist a om tatna sum le pai a leithoh ngai hilou in, hehpihna ziaka a thawn a siamtansakna ahi. Jesu sisan Pa Pathian mai ah nang leh kei khelhna ziaka thupha tawina dinga luikhiak a om, Pathian in a pom zia in, ginna a muh dinga luikhiak a om in, ginna a hiai tatna pom peuhmah a dinga suahtakna ahi ta hi. Halleluiah!

Thukhitna: John Piper gen bang in, Toupa Jesu tot Kros lampi, lampi ngeina leh tot ki thalawp huai hihetlou

himahleh, Aman ana tawn in a bul apan a tawptan ana paisuak teitei ziakin, Jesu sihna lampi kia hinawnlou in, mikhialte a dingin hinna lampi suak hi. Hiai lampi haksa tawn a paisuak teitei Jesu in, thuaknate bangmah a simlou a, mikhialte itna ziaka sawina huai setak, et ngam huailou liamna a thuakte ziaka, nang leh ken tangtawn hinna tang thei i hihman in i hampaha petmah hi.

London Police officer leh Laisiangthou sutsiam Sir Robert Anderson in, *Jesu Khrist kros, sit neilou leh chiantan neilou*

Pathian itna genkhiak na ahi a chih bang in, Toupa Jesu Krist sihna, Pathian apan mikhialte itna lahkhiakna, batlah neilou Pathian itna, hotdamlah neilou leh mikhial pen leng hotdam zohlouh neilou a thilhihthei ahihman in, a thupi in a manpha petmah hi. Jesu sihna mulkimhuai, nang leh kei a dingin sihna manpha penpen ahi ta hi. Huaiziakin, Good Friday in, nang thuakna te hilou in, Toupa thuakna leh a thuakna san ngaihtuah a hamphatpih dinga na kibawlthakna hun hi dingin Toupan hon vualzawl hen. ■

Easter Sunday Message

JESU THOHNAWNNA

[Matt.28:1-20]

~ Rev. V. Thangkhingin

Thumasa: Jesu Khrist pianna toh kisai Tanchinhoih gelhtu lite lak a Matthai leh Luka kia in a taklat lai un a sihna leh thohnawwna tuh Tanchinhoih li-te ban ah Thukhun Thak sung ah a tamtheipen leh a chiang theipen a gen leh taklat ahi uhi. Huaiziak in, Jesu Khrist sihna apan athohnawwna tuh gingtute khovel tung a i vualzohna leh sahkhuah dangte tengteng tung a i tungnunna ahihman in Toupa' min i phat hi. Jesu han apan thounawn lou himaizen leh i gin uh bangmahlou hi dia, i khelhna ua om nilouh ding in, Khrist a sisate leng amangthang himaimah

ding uhi (*1Kor.15:17,18*). Hiai thohnawanna thu Matthai gelh apan saulou in enkhawm leng i chi hi.

A Ni & Hun: Sabbath ni bei nung, ni sagih ni masapen phalvak in chih ahi (*Mat.28:1*). A pianna bang lou in ani leh ahun teltak a taklat ahi. Sabbath tuh kiginni nitum abei ahi. Huai nung in numeite'n gimnamtui han a ken di lei in buaipih thei pan uhi (*Lk.24:1*).

A Kisaipih Mite: Matthai in agelh mimal, pawl leh thiltung khenkhatte apan sinlai lak tuak omte saulou in i enkhawm ding. Amaute:

1. Mari Magdalin- Mari min nei tamtakte toh theihkakna ding in apianna khua Magdala (*Galili dil piau a-om, Kapernaum apan mel thum a gamla*) toh genkhawm sek ahi. A inkuan toh kisai genna om kei a, Jesu zui lehleh thei ahihna ah inkuan mohpuakna gik neilou hi dia gintak ahi. Dr. Luka in Mari Magdalin thei mahmah ahih ziak in Pharisai Simon a inn a thau mantam nuhtu mikhial numei toh mi kibang hi dia gindan om adik kei chih Lasiangthou sut atamzawte gindan ahi (*Lk.7:37-39; cf. 8:2*). Tanchinhoih ah hiai Mari min sawm-le-li vei

genkhak in om a, midang toh genkhawm ahih hun in giat vei ngut amasapen zel akoih ahi (*Cf. Jh.19:25 ah bel Jesu' nu leh a sanggamnu' (Kleopas zi) salam a Jesu inkuante ma a om ding kilawmlou a hikha ding*). Amah kia a 5vei genkhak a omnate tuh Jesu Khrist sihna leh thohnawanna toh kisai ahi uh (*Mk.16:9; Jh.20:1,11,16, 18*).

Hiai Mari Magdalin in hichi khop a Jesu a itna leh akipumpiakna tuh a sung apan dawi sagih (*sagih=nambat bukim*) hawlkhiahsak a asuahtaksak ziak ahi ngei ding. Luka in Jesu'n dawimat ahidamte Joanna leh Sussanna leh midang tampite toh teh in Mari koltanna khawk leh huaise diak ahi chih amuh theih hi. Dawi khat lel le thuak hak mahmah ding ahih na ah (*Lk.8:1-2; Cf. Mk.16:9*). [*A tanchin kimuhnate- Mt.27:56, 61; Mk.15:40, 47; 16:1; Lk.8:2; 24:10; Jh.19:25; 20:1,18.*]

- Gingtute tuh diabol sal apan suahtaksakte ihi ua, nakpitak a kipak ding leh theihtawp a hon Suaktasaktu' nna semtute i hih ding ahi chih

hon sinsak hi. It Johan in, “... *Pathian Tapa hong latna pen diabol nasepte ahihmanthat theihna ding in ahi.*”(1Jh.3:8b). Hebru laikhak gelhtu in, “... *a sihna a sihna thuneipa diabol a hihmanthat theihna ding...*” achi hi (Hb.2:14b). Jesu loungal setan khut apan hon hunkhezou ding omlou ahi.

- Laisiangthou in “*kipahna dan leng thei un*” hon chih lai a phak sawm damsakte lak a kipahthu gen thei omsun kiang a Jesu’n “*kua te koi ah*” achi te lak a pang kitam mahmah ding ahi (Kol.3:15b; Lk.17:17). Gingtute’n a nget kia pibaw lou a kipahthu gen leng ngaih poimoh mahmah ding ahi.

- Khovel a thahat pente, kumpi thupi leh thilhihthei pen kichiten leng a zoh louh Setan tung a zohna Jesu Khrist tungtawn a nei i hih man in i hamphatna kipahpih pen, suan pen leh buaipih pen a i neih ding ahi.

2. Mari Dang- Hiai ding ginmohtamtaktelakahnungzui Jakob Neuzaw (*James the Less*) kichi nu’ Mari hi dia gintak ahi (Mk.15:40). Hiai numei nihte thohnawwna thuthak za masapen leh thounawn Jesu

tuak masapen ahih uh apu mah ahi uh. Aziakte- Jesu nasep sak a zui vialvialte ahih ban uah nungzuite’n a taihsat lai un Khros a ki-kih lai mit mahmah a mute ahi ua, han a sial lai ua hankhuk mazawn a tute ahi uhi (Mt.27:56,63). Tu in a itna nasep thaman uh mu a thohnawwna kipahna tang masapente ahi ua, hiai thu kipahhuai gingta a, kipahpih a gensawn ding a thupiak ahi uhi. Hiai numeiten angel thupiak kipahpih lua, sepsuah kilawp lua ahih man un a pai mengmeng uh deihkhop lou in a tai thoh hial uh chih i mu hi (Mt.28:8).

- Thounawn Jesu thupiak semsua dia bangziak a tulai gingtute chouchou ngai (*mission motivation, biakin kai, thilpiak, adg.*) i maimah diam aw chih kingaihtuah tham ahi. A muchiante zaw kipak a kilawp lua uh hi a!

3. Zinling- Jesu sihna toh kisai a anih veina ahi. Jesu kivuina hankhuk kimnai lak leh Angel in suang a khukkhiak lai a thiltung hi ding hi. Jesu hankhuk apan a thohkhiak na dia hiai zinling in panpih hilou in, Amah thilhihtheihna

ziak liauliau a thounawn, Pathian in a kipahpih ziak a thillamdang leh chiamtehnate zuisak ahi zaw. A thilsiamten a siamtu suun uh chihna ahi (*Tempul puanzak kek, zinling, suangpitem khangkham, han kihong, khimzing, adg.*).

4. Van Angel- Jesu thohnawwna puangzaktu leh han kongkhak suangtum khukkhetu ahi. Jesu pawt na dia suang khukkhiak kul hilou in han vuak enchian dia numeite leh sawltakte lut na ding kong honsak ahi zaw. Thounawn Jesu tuh suangtum maimai dal zoh ding hilou ahi (*Joh.20:19*). Hiai thohnawwna puangkhetu leh theihpihtu angel ahiah mah bang in gingtute thohnawn hun Chiang a pikhawmtu leng angel thupite mah hi ding uhi.

5. Hankhuk Vengte- Sepaih huhamlehmuahuaitelkhiakte himah le uh lau a ling in, misi bang mai khawphawklou in om uhi. Nungzuite'n Jesu luang agukkhiak ding uh vengtu ahiah lai un hong gukhia uh chi a theihpihtute dia bawl in hong om uh. Ngeina dan hileh han vengtu dia koih a om in ihmutsan, khutvuak a om nungzui tamloute apan vengbit

zoulou chih tuh thil zumhuai tawpkhawk leh sihpiah gawtna (*capital punishment*) piaktak mite ahi uhi.

- Pathian a gamtat Chiang in leitung thil bang mahmah adalzou omlou ahiah man in biak leh belh ding pen mah bia a bel kha i hihna uah i phutkhak haksatna chiteng ah hon khamuang sak a, hampaha mahmah i hi.

- Melma leh thil khenkhatte ziak a lau leh patau deuh gige na hih leh Pathian muanhuaiana sut thak inla, a angung muanna ah kitulut in.

6. Siampu Lianté & Upate- Hiai mite tuh- Jesu matna dia zuau phankhawmte, a tungthu vaihawmna dia dan omsa palsatte; Pilat kiang a hekna dia thuse bawltawmte; A thohnawwna thudik selmang dia vengmite golhna sum tampi pete ahi uhi. Mihing lemgelsiamna in thudik selmang zou ngeilou ding, a tawp a thudik mah vualzou ding ahi.

- Jesu thohnawwna thu kipahhuai nungzuite hilh dia numeite kintak a atai lai mah un hiai thu doudal dia

panlakna leng kinoh mahmah ahi chih i mu hi (Mt.28:11-15).

- Tangthupha genna leh nna hoih sepna khatpeuh ah setan leng om maimai lou in a zatttheih zatmoh zang a hon dou leh hon thadual sak dia mansa gige ahih man in hangsan leh kuhkal suah gige ding ahi.

Thounawn Jesu leh A Thuvaikhah- Galili gam a Jesu'n tang a sehsak ah nungzui sawm-le-khatte ban ah Korinthte kiang a Paul in unau zanga sang a tamzaw a chihte leng tel ding in Laisiangthou siam khenkhatten gingta uhi (Mt.28:1;1Kor.15:6). Hiai kithuahkhawmna nanung a Jesu'n thil poimoh mahmah thum ahihpihte-

1. A Thilhihtheihna A Muchiansak: Sihna tung a vualzou a A thohnawn nung in thil tengteng amah thunuai ah Pathian apeta chih a pulak. Tu-in, lei leh van a thuneihna tengteng tawitu a Heutupa uh hi in, amaute A sikhate ahita uh. Mihingte bawlsiatna hun beita, Pathian in nakpi a tawisang in bangkim tung ah akoih ta chih a muchiansak hi (Phil.2:9-11).

2. Nna A Guan: Namchih apan nungzuite bawl dia mohpuakna piak ahi uh. A thilmuh leh theih uh amau tan a bei mai ding hilou in, Judate lak kia leng hilou khovel uap a phuanzak ding chih ahi. Jesu'n hiai nasepna Pathian a Mithumte (*Trinity*) kigolh ahih dan Chiangtak in pulak hi. Hiai Nnagotna Thupi mah tuni a saptuam in nnapi a i neih uh ahi. Sa leh gal, kial leh tak maituah kawm a leng hiai nnagot thupi nelhsiah theilou i hih phawk a semte ihih man un Toupa' lungkimna sukha zek bek dia kilamen i hi. Hiai nna kitat zen dia Pathian in gal hon dou sak di'n i ngaihtuah kei a, huai ding mah a thum ding in i kingen hi.

3. Ompih A Chiam: Galili gam a mite kiang a hiai mohpuakna piak a om tuh huphulhhuai leh hihvualloh a bang mahmah ding. Himahleh hiai thupiak toh ton a khamuanna tuh- "*Ngai un, kei tangtawn in, khovel tawp pha in leng, na kiang uah ka om gige hi*" ahih ahi (Mt.28:20b). Hiai nna poimoh sep ding tuh gingtu michih tung a hon ngak himahleh ei kia hon semsak lou dia a thupetu mah in hon

makaih gige ding ahih man in kithalawphuai ahi.

Thukhitna: Leitung ah sahkua thupi taktak tampi om mah leh a mukhetute sihna apan thounawn kuamah a-om kei uh. Khristian sahkua vualtungtuanna tuh i zuih leh biak uh Jesu Khrist kivuina ‘**Han Vuak**’ (*Empty Tomb*) a suahna ahi. Sihna tung a vualzou Jesu Khrist tanchin tangkoupah leh namchih kiang

a puanzak ding tuh saptuam project tuamtuam- Building, Furnitures, Plot, PA System leh adangdang khekkhiak vual hilou ahi. Jesu’n “*Agam leh ama Kial-le-tak diktatna zong masa un, huchi in hiaite tengteng ahon piak behlap ding*” (*Mt.6:33*) achih hinpihte hi ding in Toupa’n simtute hon vualzawl hen aw. ■

INNKUAN KIPUMKHATNA

~ Pastor P Hau Shoute, *Bialtu Pastor, EBCC Kualnuam*

Ngai in, unaute kituak diamdiam a omkhawm anak hoih in, anuam mahmah hi! (Sam 133:1 BSI)

I. THUPATNA

Amasa in buaina thupitak lak a honpitu Pa Pathian min ka phat hi. Innkuan kipumkhatna chih thupi gelh thei dia deihsakna hon pia heutute tung ah kipahtu ka gen hi. Pathian in Leitung (Eden) ah innkuan na pan in mihingte innkuan in honna omsak hi. Leitung ah gam tuamtuam na bawl a, nam tuamtuam na tengsak a, amaute innkuan innkuan in khuakhua ah na tengsak a, tuabang a teng khawmte lak ah - i nam leh i khua-le-tui hoih na ding innkuan kipumkhatna/ innkuan chidam poimoh mahmah hi.

II. INNKUAN KIPUMKHATNA

1. Innkuan/Innsung: Leitung ah mihingte innkuan

nei in i khosa hi. Innkuan bangzah hiam tengkhawm in khua om a, khua bangzah hiam kigawm in gam/nam

chih in om hi. Huai tengteng Pathian deih dandan a om ahi. Rev. Paukhanmang Guite in a laibu “*Khristian Innkuan*” ah, “Innkuan i chih leitung a kiukna masapen hiding a Pathian in a bawl ahi. Pathian in tup leh ngim kichiantak nei in innkuan ana pankhia hi. Huaiziakin, leitung pianchil akipan leitung bei dong a bei ngeilou leh omden ding omsun tuh innkuan ahi. Innkuan tungtawn a chi hongpungten leitung a luahtim ding uh Pathian thiltup ahi. Leitung luahtim ding sang a Pathian lungsim a poimoh zaw leh thupi zaw omlai tuh innkuan tungtawn a mihingte tengteng hotdam a omding uh ahihdan i Laisiangthou a laibu masapen akipan a nanungpen tan in kigen suak sipsip hi,” chi hi. Huaiziakin, tuni a i innkuante a maww a om himaww lou in Pathian tup leh ngim sung a om kha chihna ahi.

Atangpi in Thukhun Thak ah innkuan a ki gen chiangin bawng 3 in gen theih hi, huai tuh – Pa, Nu leh Tate ahi ua, amauten innkuan sung ah mohpuakna nei chiat uhi. Laisiangthou a kigen bang in amauten a mohpuaknate uh

kizen leh fel tak a hon zuih chiang un innkuan kipumkhat leh Khristian innkuan hoih hong suak hi. Chuck Swindoll in, “Paidan ding hoih tak ki sekna mun tuh innsung ahi a, huan, niteng hinkho zat didan hoih leh kilawm sek khiakna mun ahi,” chi hi.

Mihingte i omna mun – i pianna, i tenna leh ne-le-dawn a i khanletna mun poimoh masa tuh innsung ahi. Dwight L Moody in, “Saptuam pian matham in innkuan phuhkhiak ahi chih ka gingta a, ka mohpuak (duty) ahih leh innkuan amasa pen a koih ahi a, innkuan ka limsaklouh louh ding ahi,” chi hi. Khopite, gamte, lingte, lenna, bankte, biakinnte, garite, sepaihte leh phonete omma in innkuan omkhinta hi. John Wooden in, “Leitung ah thil tengteng lak a poimoh pen tuh innkuan ki-iitna ahi,” chi hi.

V Ngulthuam in a lai gelhna ah “...innkuan ah Toupa Pathian chiklai peuh in ten a ut gige hi, Toupa Pathian in leitung ah omna, tenna ding a mun amuh sun tuh INKUAN ahi. Leitunga inkuan masate kiangah Toupa Pathian ava lengla sek, ava

kithuah khawm sek uh chih i Laisiangthou in mun tampi ah hon hilh hi... Innkuan kichi- itna pak namtui kizem, hehpihna, itna, leh thutak a dim, muanna, dohtheihna, kipumkhatna, kipahna, lemna, lam etna khovak, Toupa Pathian pahtawi a a omna inkuan ah van a angekte tenna dingin a enlah mahmah ua, sun leh zanin a vel gige sek uhi,” chi hi.

2. *Innkuan kipumkhat a poimohna:*

Leitung i tenna ah makai tuamtuam- simlei vai a makaite hi hen aw, khosung leh mipi nasekte, sahkua leh biakna makaite hi hen la, solkalmilian-mineu, mihau leh mizawngte hita leh a hoih leh hoihlauh innkuan kipumkhat/ chidamna ah kinga mahmah hi. Zig Ziglar in, “Mi innsung ah kipumkhatna hoihlak neiten kholak ah a hoih zaw sem anei uh,” chi hi.

Innkuan hoih a om kei leh khotang/nam sung hiam hoih chih om ngeilou hi. Pathian in innkuan kikepna poimoh sa mahmah hi. Anthony Liccione in, “Mi teng in teenna ding inn a poimoh ua, himahleh innkuan kipumkhatna in

teenna nuam a bawl hi,” chi hi. I kepdan -i thuhilh/hilhlou dan in hong khang lian uhi. Huai in khotang (society) hoih leh hoih lou hong ki lang khe mai hi. Innkuan kikepna a kizen kei leh vaihawmna lian zaw – saptuam, khotang, Govt. chihte a pai dik thei kei hi. Laisiangthou in, “Midiktat’ innsungah gou tampi om a, migilou’ lawhkhiak hauhna bel buaina lel hi ahi,” chi hi (Pau 15: 6 BI).

Innkuan kipumkhat sunga khanglian miten – nu-le-pa zahtakna lungsim nei ua, thumanna lungtang vom ua, sang a uu zawte zahtak theihna lungsim nei uh ahihman in, gam-le-nam vai hiam, saptuam vai hiam a makaihna a let khak chiang un Toupa vualzawlina tungtawn in amakaihna uh lamzang in lohching uhi. Diktatna leh thutakna toh vaihawm ua, a dik a tang a paina pawl khat peuh ah om hi. Innkuan kituahna leh kipumkhatna a poimoh dan Laisiangthou in hi chin na gen hi, “Kina-kisel kawma in dima nopbawlina ankuanglui sangin, kihouthei taka ankhang gaw nek

ahoihzaw,” chi hi (Pau 17:1 PEP).

Henry Gardy (USA gam a makaitu khat), khota ah vazin a, a tunna pa'n a innkuan kizen tak mai a a etkoldan va mu in, “Washington innpi (capitol) i gam vaihawmna kasak leh, a na hi het kei, hiai singtang khua, innkuan mawl khahte, Pathian ma a khuk din gigete ziak a i nam hi chitak a a na thupi thei ahi,” chin gen hi. Gam-le-nam, khua-le-tui itna kichi innkuan a kipan ding ahi. Mosi in hichi tuk a maban dinmun hoih leh thupi nei napi, nam itna ziak apaisan a a mite toh sukgentheih a telzawk theihna ziak bang dang hilou in, innsung a a nu thuhilhna ziak ahi. Huaiziakin innsungkuan kikepna dan zil in society pai ahihman in, innkuan poimoh mahmah hi.

3. Innkuan kipumkhat lou/chidam lou a lauhhuaina:

Laiigelhtu khat in, “Gamsung a nekguk (corruption) a om tuan kei a, innsung hoihlou akipan sorkar/sepna hon sep Chiang ua nekguk hong om hi lel hi. Diktat louhna leh nekgukna

a tam, khosung a nuam kei i chih leh tuh innkuan kisia a tam chihna ahi,” chi hi. Laisiangthou in, “A huaiham mi in a innsunga buaina tun, a chi hi (Pau 15:27a BI).

Laisiangthou in, “Toupa hamsia migiloute inn ah a-om; himahleh midiktatte tenna avualzawl hi,” chi hi (Pau 3:33 BSI). Khotang hiam, sorkar i chih mihingte mah ahi a, mihingte mah khosung a teng khawm i hi a, innkuan ki nei chiat hi.

Julia Hare in, “Adam leh Evete Pathian in a inn ding un Eden huan pia hi. A luahdan uh a diklough ziak in a suante tan in lei hamse dongtu a suak uhi,” chi hi. Pathian mitna omlou innkuan tuh, nam hamsiatna ahi (cf Sam 9:17). Mahni innsung ngaihsaklou a gam leh nam itna zaw a lem lel ahi. Innsung ngaihsak lou, zi leh tate zulhzausan a, mipi makaih hi zaw, hamse thuakna lel hi kha thei ahi.

Carle Zimmerman (*khotang, gamsung siatna - nekguktak gukna a ziak suitu*) in a gelhna ah, “Gamsung ka en a, gamsung asia a chih Chiang un

innsung kisia ahi a, khotang kisia a chih chiang un innsung kisia hi,” chi hi. Huaiziak mah in mipil misiamten innkuan kikepna awlmoh mahmah uhi. Laisiangthou in, “Amah insung hihbuaitsu a kihawmkhai ding a...,” chi hi (Pau 11:29 PEP). Gamsung, khotang leh namsung hoihna dingin innsung mah na poimoh hi. Toupa in innsung vaihawmna masa hamphatna hon piak ahi a, hiai hamphatna theisiam a kipumkhat ding i mohpuak ahi.

III. THUKHITNA

Huaiziakin, innkuan kipumkhatna mah i ki bulphuhna ding ahi. Aziak bel Pathian in innkuan kipumkhat ding a a hon siam/pat ahi. Tuni in innsung i en ding a, hih khelh omte ki ngaidam tuah in innkuan kipumkhat sawm ni. Kingaidam tuah chiat ni. Innkuan i chih Toupa innlam a hi a, a deihdan a luah ding ahi.

Melma setan in innsung a poimoh dan thei in i innsung hon khoih hi. I nam ki ngakna, i khotang kingakna suangphum innsung hihchip sawm hi. Innsung kisia in nam

leh khotang/khosung (khopi leh khota) leh saptuam kise sak hi. Hiai tengteng kingakna suangphum tuh innsung/innkuan ahi. A suangphum kingakna a kip kei leh bel, nikhat tei hong kichim ding hi. Toupa tellou in innkuan kipumkhatna a om thei kei, huchimah bang in Toupa tellou in innkuan a bit thei kei chih thei gige kawm in Amah pina, panpihna leh ompihna i nget gige kul hi. Innkuan kepbidna ding in sungkuan a mimalten Laisiangthou sim leh innkuan maitam i hahkat mahmah ding ahi. I innsung ah Toupa i sap lut a, i tensak ding ahi. Innkuan khat a hon koih Toupa ahih chih phawk gige ni. Nang na innkuante koilam na nawtpih a?

Laphuaktu in, innsung nuam vangam naipen, chi hi. Vangam naipen ahih theihna dingin ei a sung a innkuan khat a tengkhawmte mohpuakna ah kinga hi. Innsung nopna leh noplough innkuan mite tungah kinga lian mahmah ahihman in Khristian innkuan mite kituak diamdiam a omkhawm a kipumkhat/chidam hi thei chiat ding in Toupan hon vualzawl hen aw. ■

KHRIST TOH KIPUMKHATNA

~ Rev. Dr. V. Ginsianthang, *DS Singngat Division*

Thupatna- EBC saptuam kum thupi 2024 “*Kipumkhatna*” ahi a, “*Pathian toh kipumkhatna*” i genta ua, tun ah “*Khrist toh kipumkhatna*” chih i kikum ding uhi. I theihsa bang in Pa Pathian, Tapa Pathian, Kha Siangthou Pathian kikhen theilou, Pathian khat a mi thum ahihman in, Pa Pathian toh kipumkhatte Khrist leh Kha Siangthou toh kipumkhat; tuabang in Khrist toh kipumkhatte Pa leh Kha Siangthou toh leng kipumkhat chihna ahi. Hileleng, hotdamna toh kisai Patahian khata mi thumte’n tanbik nasep (prominent role) nei chiat uh ahihman a, atuam chiat a genkha zel i hizaw hi. Tua ahihman in, thildang tampi genlou in Khrist toh kipumkhatna toh kisai thu poimawh mahmah tamlou, Laisiangthou pansan in i taklang ding hi:

1. Gingtute tengteng Khrist sa khat, pumkhat chihna ahi a siam (Eph. 2: 10), Khrist toh kilhden (Gal. 2: 20), Khrist toh vui khawm leh kaihthoh kawm a om (Kol. 2: 12), Khrist sihna a ki tuiphum khawm (Rom. 6: 3), Khrist toh thounawn khawm (Rom. 6: 5), vanmunte a Khrist toh tukhawm (Eph. 2: 6), gingtute a Khrist siam piching a om dia lamet (Gal. 4: 19), ginna Khrist gingtute lungtang a hong teng (Eph. 3: 17), saptuam (gingtute) tuh Khrist pumpi hita (1 Kor. 6: 15; 12: 27), Khrist ei a hong om in ei Amah a om (2 Kor. 13: 5; 1 Kor. 1: 30). Huaiziaka Khrist leh gingtute (saptuam) tuh
2. Atunga i taklat Bible tangte ban ah, gingute tuh Khrist a siamtansak a om (Rom. 8: 1), Khrist a pahtawi a om (Rom. 8: 30), Khrist a siangthousak a om (1 Kor. 1: 12), Khrist a sap a om (1 Kor. 1: 9), Khrist a hih hin a om (Eph. 2: 5), Khrist a thilsiam thak suak (2 Kor. 5: 17), Khrist a poma om (Gal. 3: 26) leh, Khrist a hotdam dinga tel i hi (Eph. 1: 4, 5). Huaiziakin, Khrist leh saptuam kipumkhatna tuh pianthakna toh tonkhawm (simultaneous and instantaneous) ahi

a, pianthak nunga hong khawnung tun/om ding hilou in; a hisa theichian a sepkiak ding, hinkhiak pih ding, kepbit tinten ding ahi zaw hi. Khrist toh kipumkhatna ziaka saptuam in (gingtute'n) hihna thak (new identity) neita i hihman a Jesu Khrist hihna leh hoihnate kikoppih a tangtawn hinna neita i hi chih mangngilh louh ding ahi.

3. Khrist toh saptuam (gingtute) kipumkhatna thil poimawh lua ahihman in Bible ah gendan tuamtuan in mun tamtak a gen ahih **ban** ah, Bible sutsiamte'n leng a poimawh dan naktak in ana genkhia uhi. Tuat lak ah nih chauh i taklang ding hi (direct quotation hilou in):

(1) John Calvin: Khrist toh pumkhatna thil poimawh penpen ahi. Aziak tuh: Tangthupha kisiandand (design of Gospel) ah Khrist ei a hongsuak ding leh ei (gingtute) amah a phuhlut (engrafted) hi dinga gelkhiak ahi, achi hi. Hiai in agen tuh, Pathian in mikhialte hotdamna ding a geelna ah Khrist leh gingtute athu lela kizom ding hilou in,

pumkhat suaka tangtawna kikhen nawnlou a tengkhawm ding chihna ahi.

(2) Martin Luther: Kei ah Khrist ateng a, kei Amah ah ka teng hi. Kei a Khrist hong ten a, kei Amah a ka om ziaik in hehpihna, diktatna, hinna, muanna, leh hotdamna chihte, kei a omsa hilou, Khrist a omte tengteng kei a leng hongsuah ahi, a chi hi.

Thukhitna – Khrist toh pumkhat chih tuh gingtute Pathian va suak chihna hilou in, mikhial in ginna a Khrist hondampa leh Toupa dinga i pom chianga Pathian in ta a honna pom, tua toh kiton a Khrist hoihna, hihna leh hamphatnate hon kikopsakta chih genna ahi. Huaiziakin, gingtute'n i hamphatna thei a, Khrist toh kipumkhatna subuai thei, i lutang Jesu Khrist leh hon sungluah Kha Siangthou hihvui thei thilte apan kihemkhia a, Khrist hon thupiak banga khosak gige ding ahi. Gingtute, Khrist toh pumkhat i hihna chian sem sema thei dingin Toupa'n simtute hon vualzawl chiat hen! ■

BIBLE STUDY



Pastor Khamkhanchin Ngaihte, EBCC Zion Local Pastor

Text : EPHESATE KIANG A PAUL LAIKHAK SINNA

Thupi: PULAKNA

THUMASA: Tukum i saptuam thupi “Kipumkhatna” chih kilakkhia kana Ephesate Laikhak ahi a, huaitawh kizui in tukum KTZ a Bible Study a Ephesate kiang a Paul Laikhak sinkhawmna pitu hiding in heutute’n hamphatna a hon pia ua, kihta mahmah lah kithalawp mahmahna tawh ka sang hi. Hihtheih bangbang in hiai laikhak poimawh tak mai sinkhawm dia kisa ihi. Simtute dinmun kikim lou ihi chih phawk kawm in a mawl lah theih siam huai di tuh i tup ahi. Huchih kawm in, Bible study ahihman in Laisiangthou suut siam khenkhatte’ suutdan leh a laikhak tawh kisai theihbeh tuak sak khenkhat leng i etkhawm zel poimawh ding hi.

PULAKNA: Ephesus kichi tulai hun in tulgawp in kuamah luahtheih nawnlauh himahleh Paul hunlai in khopi thupi, lian, leh poimawh mahmah khat ana hi. Tulai a Turkey kichihna gam, Asia Minor a tumlam tui pi kiang a om khopi lian khat ana hi ahi. Sumsinna leh siamsinna munpi khat ahi a, Longkhawlna mun poimawh, Rome kumpi ukna nuai a khua hausa mahmah khat ahi. Gam tuamtuum apan pemit mi nam tuamtuumte tenkhawmna mun, “mother city of Asia” chi a theih a ana om khua ahi.

Sakhua lam ah milim biakna mun poimawh khat ahi. Greekte pathian lim Artemis pathiannu (Diana pathiannu leng kichi) biakna mun thupi khat ahi. Hiai Artemis/Diana pathiannu kichi tuh lei chihoihna/gahsuahtheihna pathian, vangphatna pathian chi a theih ahi.

EPHESA SAPTUAM: Ephesa khua a saptuam, Paul in a missionary khualzin nihveina kiiklam AD 52 vela a phuhkhiak ahi. Anung kumkhat zawh in Paul in a missionary khualzin thum veina ah, Ephesa khua

a kum nih leh akim/kum thum sung vel tam in Pathian thu gen in sinsak hi (Nasepte 19:1-20). Tuanung sawtlou in Ephesa saptuam upate tawh Mileta tuikulh gam a kimu tuah (Nasepte 20) in, ama painung a saptuam enkol a kem ding in Timothy sawl hi (1 Tim 1:3). Hiai laikhak khakna masa mite tuh Ephesa khua a saptuam/gingtute ban ah Asia gam bung neu (Asia Minor) sung agingtute ahi ua, huai teng ban ah leitung maikaih a gingtu tengteng ading a gelh leng ahi.

EPHESA LAIKHAK GELHTU LEH A HUN: A laikhak gelhtu tawh kisai suidan leh gindan tuamtuam om mah leh, Paul in AD 60 vel a Rome suangkul a khum a a omlai a agelh, Tychicus (Taikikus) tungtawn a a thot ahi chih tuh Laisiangthou sutsiam tamzaw te ngaihdan leh pomdan ahi. Hiai mah tuh tuni tan a saptuamte pomdan (traditional view) ahi. Philipite, Kolosate, Philemon laikhakte a khak hun kibang vel ding a gen ahi. Hiai laikhak a gelh zawh kum tamlou (AD 64/65) in Rome khua ah Paul thah in om hi. Suangkulh a tanlai a akhak ahihman in Ephesa Laikhak

tuh Suangkul laikhak (Prison Letter) aki chi.

Paul gelh hilou kuahiam dang in a gelh hiding chih gingtate pansan deuh a kigen khenkhat ahihle, Paul in laikhak dangte a a laimal zat tangpi Ephesa laikhak a kizanglou tampi om chih bang, a Pathian thu suut dan chituam deuh sakna ziaik bang, laikhak dang a a zat louh laimal kizang khenkhat omte ziaik khawng in Paul gelh hilou ding ahi chi uhi. Himahleh, a thusung paidan apan leh tua hunlai a laigelhtute thugelh dangte apan in Paul gelh mah ahi chih chetna (internal and external evidences) kining ching huntawk hi.

PAUL KUA AHIA? Paul ichih Saul chi a leng theih in a om hi. Saul pen a Juda min ahi a, Saul pen a Greek min ahi. Israelte kumpi masa Saul min tam a anu leh apa'n Saul ana chih uh hidia gintak ahi. Juda mi hihna leh Rome khua leh tui hihna nei ahi. Mihing a piangkha peuhmah in hinkhua masa leh nanung i neih bang un Paul in leng ana nei hi. A hinkhua masa lam ah Juda nam ahihna sang a poimawh asak zawk omlou in, Juda sabiak doudal

hi a a theihpeuh beisak tum a thagum thatang tawh ana pang khat ahi. Juda sabiak dan zuihkimna a dem bei ahi (Phil 3:5-6). Jesu Khrist doudaltu muanhuai, Juda sahkhuagum a Pathian' saptuamte hihmanthat sawm a ki pumpei khat ahi (Nasepte 8:1-3).

Himahleh, Pathian' itna in uapkha ban veve ahihman in lamdang (dramatic) tak in a hinna khek in om hi (Nasepte 9). Huchiin, a hinkhua masa a huat pen tuh a hinkhua nanung lam ah a itt pen leh manpha asak pen a hong suak hi. Jesu Khrist simmawh leh demtu thupipen apan Jesu Khrist gumtu leh a itna thu genthangu thupipen ahong suak hi. Mihing hiam huai hunlai a saptuam makai lian khenkhat tawh kimeltheih ziak hiam deihsak ziak a sawltak nna sem hilou a, Jesu Khrist kilakna mu a, Pathian mahmah in sawltak dia a sap ahi (Gal 1:1). Pathian amuh hun apan a hinkhua manawhna lam leh a lunggulh leh thupi asakte kikhek vilvel a, manpha asak (a value system) leh a thil et dan (worldview) kikhek vilvel hi (Rome 1:16; Phil 3:7-10). A pianthakna ziak a Paul hinkhua

a kikhekna bang kikhekna i gam a gingtute lak ah poimawh hina mai zen hang e!

EPHESA LAIKHAK

MANPHATNA: Ephesa khua mallai in Asia gam a khopite' Nu (Mother city of Asia) chih a theih a a om bang in Ephesate kiang a Laikhak leng "gingtute sumbuuk" (believers' bank), "gingtute checkbook," leh "treasure house of the Bible" (Bible Thu' Goubawm) chi bang a theih ahi. Hiaite apan in i Bible sung a Ephesate kiang a Laikhak thutuun manphatna leh poimawhna kilang chian hi. Khalam galdouna ding a Jesu Khrist a gingtute' khalam hauhsakna genna laibu poimawh ahihban ah, Jesu Khrist a ki lamtou Saptuam kipumkhatna leh gingtute khat leh khat kizoptuahna chidam neihna ding a khalam hauhsakna kiningching genna bu ahi.

Saptuam khangthu ah, saptuam kikepna a gingtute hinkhua thuzawh zou pen te lak a laipoimawh mahmah khat hi a chiamteh ahi. Paul in Pathian a muhdan leh theihdan (theology) tomkim tak a a taklatna bu ahi a, saptuam

masa a makai minthang tamtakte hinkhua chawmtu laithon ahi. Saptuam pianzia leh a tup genchetna bu ahihban ah, gingtute niteng hinkhua a tha petu leh hanthawntu laibu poimawh mahmah khat ahi. John Calvin in Bible sung a a deihtawh pente lak a khat hi a gen ahi. Laisiangthou suut siam F.F. Bruce in “Paul ginna tawh kisai (Pathian thu sutna tawh kisai) a bukim a a omna laithon tuh Ephesate laikhak ahi” achi.

A THU TUUN: Ephesa laikhak ah laikhak dangte banglou in sinsakna diklou kalhna ki mulou hi. Gingtute niteng hinkhua tawh kisai a hanthawntu laikhak ahi peuhmah hi. Jesu Khrist i chih gingtute (Juda mi leh Greek) kia hilou a thil siam tengteng kikkaikhawmna/kipumkhatna bulpi (cosmic reconciliation) ahi chih Paul in gen uang hi. Saptuam pianzia leh kipumkhatna, Khristian hinkhua dik leh tang, khalam galdouna hinkhua, inkuan sung leh nasepna a Kha makaih hinkhua chihte Paul in a gen tangpi laktom ahi. Ephesa laikhak a Paul in Pathian’ Thu a bulsuutna a thupi kilang deuhte – Pathian

a Mi thumte (Trinity), Pathian Pa ahihna (Fatherhood of God), Jesu Khrist hihna, pianken leh nasep suutna (Christology), Khasiangthou pianken leh nasepna lam suutna (Pneumatology), hotdamna thu suutna (Soteriology), saptuam pianzia suutna (Ecclesiology) leh Kilemkiikna (Reconciliation) chihte ahi.

A THUTUUN KHENZAKNA: I theih siamna ding in Ephesa Laikhak anuai abang in khen nenna i bawl ding. Bung 1:15 – 3:21 sung Jesu Khrist a gingtute dinmun suutna (indicative section) ahi a, 4:1-6:24 sung ah Jesu Khrist a gingtute dinmun/hihna tawh kituak a muhtheih a hinna (imperative section) ahi.

A. Khrist a gingtute hihna leh dinmun: (1:1-3:21)

1. *Chibai Buukna leh Khrist a Khalam vualzawlinate (1:1-14)*
2. *Kipathu genna leh Thumna (1:15-23)*
3. *Gingtute hinkhua: Hun Paise leh Tulel (2:1-10)*
4. *Khrist a Khatsuahna: Judate leh Jentelte (2:11-22)*
5. *Paul nasepna leh Khrist a Pathian thuguuk (3:1-13)*

6. *Khrist a kipumkhat dia Thumna (3:14-21)*
- B. *Khrist a hihna Niteng hinkhua a hinpihna: (4:1-6:24).*
7. *Saptuam: Kha a kipumkhatna (4:1-16)*
8. *Khrist a hinna thak tawh kituak Niteng hinkhua (4:17-32)*
9. *Vak a khosakna (5:1-20)*
10. *Inkuan leh nasepna a Vak tate hinkhua (5:21-6:9)*
11. *Pathian Galvan a kivatna (6:10-20)*
12. *Chibai Buukna Nanung (6:21-24).*

Conclusion: Ephesa te kiang a laikhak Jesu Khrist tungtawn a saptuamte khalam vualzawlina leh hamphatnate sinsakna poimawh tak ahi. Pathian thu i suut dan ichi hiam Pathian i muhdan pen niteng a i Khristian hinkhua zat dingdan kingakna bulpi ahi. Huaiziak in, i thugin/doctrine ichihte i hinkhua tawh kisai lua ahihman in ngaih poimawh mahmah ding ahi. Thugin dik in Khristian hindan dik suang ahi. Gingtute'n ihihna leh dinmun diktak i theihlough Chiang in i hin dingdan diktak a hing theilou ihi. Pathian ta ihih i theihchetna tawh

kituak a Pathian ta bang a hing thei ding hihang. Simtu deihtakte, hiai Ephesa laikhak I sintouhna ding tungtawn a Jesu Khrist a I hihna leh dinmun theichian a, tua tawh kituak a khawsa thei ding in Pathian in hon vualzawl chiat hen.

Laibu Ette

- Arnold, Clinton E. Ephesians. Zondervan Exegetical Commentary on the New Testament, Grand Rapids: Zondervan, 2010.
- Carson, D.A., & Douglas J. Moo. "Ephesians," in An Introduction to the New Testament, Grand Rapids: Zondervan, 2005.
- Hoehner, Donald A. Ephesians. An Exegetical Commentary, Grand Rapids: Baker Academics, 2002.
- McArthur, John. Ephesians. The McArthur New Testament Commentary, Pune: Grace to India, 2014.
- Kostenberger, Andreas J, L. Scott Kellum & Charles L. Quarles. "Ephesians," in The Cradle, The Cross, and The Crown: An Introduction to the New Testament, Nashville: B&H Academic, 2016.
- Wood, A. Skevington. Ephesians. The Expositor's Bible Commentary, Vol 11, Frank E. Gaebelin (ed.), Grand Rapids: Zondervan, 1981.
- Guite, Paukhanmang "Kipumkhatna: Ephesate 4:1-6," EBC Kumsim Khawmpu 75na, Dec 7-10, 2023 sung Gospel Centenary Hall, New Lamka a neihna a Bible Study Note. ■



Gammial Aw

Tawngtawn a mangthang mai ding i hihlai a, a zahngaihna ziak a hon zongkhia i Toupa leh Homdampa Jesu Khrist min in chibai aw.! Buaina kawmkal ah khosa himahle hang Pathian gamna sem a field a i kalsuannate'n masawn zel in gingthak, baptisna leh thilpiak petu ding piak a om zel i hihman in kipahhuai i sa mahmah hi. Semtute'n leng amau hihtheihna zahzah suah a kisuuk a kuhkal leh chihtakna suah a hon sepna gahte uh ban ah saptuam mite thumna leh thilpiakte ziak a gah kipahhuai taktak muh theih hong omzelte manpha i sa hi. Saptuamte'n i hihtheih khomkhom suah a thumna leh thilpiak a i na pannate thawnlou ahildan hiai anuai ah semtute apant report kaihkhop a omte enkhawm nawn ni.

A. HIMALAYAN MISSIONS FIELD

KIPATHU GENNA LEH THUMNA DINGTE:

1. Toupa'n Field a semtute leh thilpiak leh thumna a na pang saptuam mite tungtawn in gingthak 5 (*Gopetar-2, Hwaku-1, Chisang-1, Birtamod-1*) hon piak nawnte ziak in kipathu gen ni. Amaute Khrist nungzui muanhuai hong hihna ding uh leh a khalam kalsuanna ding uh thumpih ni.
2. Semtute'n a sepna maban chiat uh lamzangtak a semtou theizel uhi. Kipathu gen in, a sepna mun chiat ua Khasiangthou ompihna tang a a hunhun a gah muh a hihtheihna ding in thumpih ni.
3. Semtute leh saptuamte sa-le-kha a chidam a, a sepna chiat ua ginom leh kuhkaltak a pang chiat theizel ahihman un kipathu gen ni. Pathian deiha dong kawmzel a hon sepzom zel theihna ding un thumpih ni.
4. NEBC sung a Indigenization policy pailel ah Field Executive Committee memberte'n Saptuamte a kisakkholh theihna ding uh leh mansa a omtheihna ding ua hanthawwna hiding in saptuamte vehna neizom thei zel uhi. Kipathu gen in, maban a kalsuanna ding om laite uh Pathian ompihna tang a kalsuan

ahih theihna ding un Field Executive Committee Member-te thumpih ni.

5. Toupa'n semtute leh a inkuanpihte uh chidamna hoihssem toh hon vualzawl sak a, khalam kalsuanna sangsem hon neihteih chiatna ding un thumpih ni.
6. NEBC Fellowship leh Saptuamte amau-le-mau kivaihawm a, ki enkol a Pathian gam kekletna ding a nasemtu muanhuai leh gah thupitak suang Missionary Saptuamte hong hihtheihna ding un thumna toh delhzui zel ni.

B. DHEMAJI MISSIONS FIELD

KIPATHU GENNA LEH THUMNA DINGTE:

1. Semtute'n gingtute toh biakkhawmna programme leh fellowship hunte bangmah nawngkaina omlou a neithei zel ahihman un kipahtu gen ni. Pathian ompihna toh lamzangtak a hon neihzel theihna ding un thumpih ni.
2. EBC Lamka South Division, DBMC huhna tungtawn in Field in Study Centre a naupangte leh Tuition Naupangte' nu-le-pate chialkhawm in ankuang umpih in, Pathian thu genpih thei ahihman un kipahtu gen ni. Hiai hun a thu kigente tungtawn a tunung a gah kipahhuaitak muh hong hihna ding in thum ni.
3. Semtute'n Winter Ministry a neihna tungtawn ua ginglouni tamtak a sukkhak theih ban uah amaute inn vehna leh nekkhawmpihna nei in Pathian thu leng genpih thei uhi. Hiai hun in ginglounite lak ah Bible Thukhunthak leh Tract hawmna neithei ahihna uah manpha i sa hi.
4. Field a thilpiak petu ding Toupa'n hon pezel a, Kapurdhuwa ah leng thilpiak (sawm-a-khat) pethak ding gingtute lak apan piak in i om hi. Gingtute lak a thilpiak tuamtuan pethak ding tamsem hong omna ding in thumna in phawk ni.
5. EBCC Itanagar, EBCC Dimapur leh Mr Akai, Gogamukh a omte'n Field a gingtute lak a hawm ding van (silh-le-te'n) tamtak a na pia uhi. Mr Sonmuan Tonsing sepna ziaak a Dimapur a omlel in leng Dhemaji a Study Centre a zat ding Computer hoihtak piakziaak in field a semtute leh thilpiak dongtu gingtute kipak mahmah uhi. Field awlmohna ziaak a thilpiak petute Toupa'n nna hoih semthei zel ding in vualzawlna hon piaksak leh i chi hi.

6. Field in EBC Headquarters huhna tungtawn in Lachan mun ah Study Centre ding hoihtak bawlkhia uhi. Hiai Centre ah naupang tamtak Pathian in hon pia hi. Centre tungtawn a naupang sinsakna piakte leh naupang nu-le-pate Pathian thu a sukkhak hong hih ua, Jesu hondampa ding a hon saantheihna ding un thum ni.
7. Pathian ompihna toh field ah semtute kalsuanna tungtawn in gingtu hih lunglut bangzah hiam om uhi. Amaute houlimpihna semtute'n neihpih zel ua, buaina omlou a maban hon sawn ua Jesu hondampa ding a hon saantheihna ding un thum ni.
8. Hostel -cum- Training Centre ministry toh kisai a om naupangte a ding in thumsak ni. Naupangte siamsinna Session thak kipanta ding ahihman in, Toupa'n naupang hon piak behlapna ding in thum ni.

C. MANIPUR MISSIONS FIELD

KIPAHTHU GENNA LEH THUMNA DINGTE:

1. Toupa'n field a semtute kalsuannate hon vualzawl sak zel a, gingthak leh baptisna tangthak ding hon piakzelte ziak in kipahtu gen ni. Gingthak leh baptisna tangthakte'n ginna kiptak hon neihna ding un thumpih ni.
2. Pathian ompihna leh makaihna toh field a semtute leh gingute'n amau omna mun chiat ah ahihtheihna zahzah uh suah a kalsuan thei zel ahihman un kipahtu gen ni. Khristian sahkhuaana doudal zawng a gamtate lak leh gingtute ginna sudengdel thei ding a gamtate lak apan semtute leh gingtute humbit a a omna ding un thumpih ni.
3. Pastor (Rtd.) Kh Ibohi Singh in leitung a khualzinna zou in, a sep thaman sang ding in February 04, 2024 in honna beisan hi. Thamnapokpi Hanmual ah a luang bangmah buaina omlou a vuiliam theih in om hi. Amah Manipur Missions Field a ding a semtute lak a mimasa i neihte lak a khat ahihna ah i it in i suun mahmah a, a nutsiat innkuan mite Toupa khamuanna ngetsak ni.
4. Field BYF te'n March 17, 2024 in Youth Motivational Program zang ding uhi. I buaina ziak un tuailaite khalam a hanthawn poimoh mahmah ahihman un subuaitu omlou a lohchingtak a tuailaite'n programme a zat theihna ding un thumpih ni.

5. Field a department tuamtuam omte'n leng amau hihtheih bang chiat suah in kalsuan theizel uhi. Kipahthu gen in, buaina kawmkal a om hihmahle uh Pathian ompihna toh mohpuakna a neih bangbangte uh hon sepsuah zel theihna ding un thumpih ni.
6. Field sung a Saptuam a tamzawte'n buaina nasatak tuak himahle uh mipi biakkhawmna neithe i zel ahihman un kipahthu gen ni. Saptuamte hihbwaitu omlou a biakkhawmna manphatak a neihzel theihna ding un Pathian kepbitta ngetsak ni.

D. HOJAI MISSIONS FIELD

KIPAHTHU GENNA LEH THUMNA DINGTE:

1. Toupan Hojai a semtute leh gingtu omte chidamna hon piaksak zel a, tuni chiang A ompihna toh semzom theizel ahihman un kipahthu gen ni. Hojai a Meiteite lakah Khasiangthou in naa hon sep a, Khrist khebul tut a hihtheihna ding un thumpih ni.
2. Mr. Oinam Ranjit (28) s/o Mr. Oinam Naba Singha tamvei tak semtute'n Pathian thu a houlimpihna nei uhi. Toupa'n i thumna leh pankhawmnate uh hon dawng in January 07, 2024 in amah kam a kipan in mikhial ahih dan kiphawk in Jesu Khrist Hotdampa in sangta hi. Toupa'n thil thupitak hon hihsak ziaik in thupina tengteng Amah i pia hi. Mr Oinam Ranjit khalam hong pichin semna ding leh gingtu muanhuai hong hihna ding in thumpih ni.
3. Hojai fellowship a gingtu tamlou chik om himahle uh ginomtak a thilpiak a piak uh sunzom theizel ahihman un kipahthu gen ni. Thilpiak a hausa Pathian ahihdan gingute'n a hon theihsem ua, gin om leh muanhuaitak a thilpiak hon piakzom theihna ding un thumpih ni.
4. Home tuition tungtawn a Toupa gam naa i sepkhawmna lamzang tak in paizom thei zel hi. Tu kumthak ah naupangte lai hihna neih ahihman in semtute'n thumna leh tanchinhoih chii tuhna ding in amaute lakah Bible thute gelhsak zel in, sappau kisinna dan in Bible sinsakna neithe i zel ahihman un manpha mahmah i sa hi.

E. DIMA HASAO MISSIONS FIELD

KIPAHTHU GENNA LEH THUMNA DINGTE:

1. Pathian ompihna toh semtute'n chidam a semthei zel ahihman un kipahthu gen ni. Maban a Ministry tuamtuam a neihte uh lamzangtak a hon sepsuah zel theihna ding un thumpih ni.
2. Semtute'n tanchinhoih a genpih theih ding uh mi a hunhun a Toupa'n hon piak zel ziak in kipahhuai i sa hi. Tanchinhoih genpih a omte'n Pathian thutak a hon theih ua, Jesu Khrist Lal leh hondampa ding a hon saantheihna ding un thumna in delhzui ni.
3. Field a semtute'n Prayer Fellowship leh Wokers Fellowship a hunhun a neihte zel ahihman un kipahhuai i sa hi. Pathian ompihna tang a kithuahkhawmna a neihzelte un semtute kal a kichimat semna hong hih ngei i lamen hi.
4. Field a Tuition Centre tungtawn a naupangte lak a Toupa gamna i sepna in masawn zel ahihman in kipahhuai i sa hi. Tuition tungtawn a thu-le-la sinsak a omte hong gahsuhna ding in thum ni.



F. GOALPARA MISSIONS FIELD

KIPAHTHU GENNA LEH THUMNA DINGTE:

1. Pathian in semtu inkuante chidamtak a hon kepsak zel ziak in kipahthu gen ni. Semtute'n Pathian thu a houlimpilh khaksa a neihte un maban ah leng Pathian thu a lunggulh zomzelna ding un thum ni.
2. Semtute leh inkuante'n taksa chidamna poimoh mahmah ahihman un chidamna hon neih ua, damlouhnate ziak a a sepnate uh suknaungkai a omlouhna ding in thumpih ni.
3. Field a tuition naupangte a kibehlap touhzalna ding in thum ni. Naupangte masawanna leng muh theih panta ahihman in kipahhuai i sa hi. Semtute leh sinsakna piak a om naupangte thumpih zel ni.

G. KAMRUP DISTRICT A SEPNA

KIPAHTHU GENNA leh THUMNA DINGTE

1. Loharghat Station mun a semtu Evan. Kaplun Paite leh a lawinu'n Pathian ompihna toh chidamtak in semthei zel uhi.

Rhabha mite lak a sem in, tua ah Pathian thu a houlimpih ding piak a om zel ahihman un kipahhuai i sa hi. A gam mite kiang a tangthupha genpih a hihtheihna ding ua kimeltheihtuahna a bawlna uh maban a leng hon sutzop zel theihna ding un thumna in phawk ni.

2. Semtute'n tukum sung ngei a Hati Dhuba khua ah ngei a Fellowship patkhiak ding tup-le-ngim a a neih uh Pathian in kong hon honsakna ding in semtute panlakna thumna in phawk ni.
3. Chhaigaon Station a semtu Evan. M Daizachin leh innkuante'n leng chidam in kalsuan theizel uhi. Khristmas programme hun a houlimpih a neihte uh tuni Chiang nungdelhtou in kalsuan zelthei uhi. Tanchinhoih khenkhatte kiang ah genkhak theih a ompanta ahihman in kipahthu gen in himahleh khenkhatte lunglut bang mahle uh ngaihsak taktak lou leng om uhi. Mr Manoj Kashiya kiang ah Tanchinhoih bangzahvei hiam genpih a om in Jesu Khrist Pathian hing taktak chih hoihtaka hon pomtheihna ding in thumpih ni.
4. Semtute'n meltheih tampitak a neihte kiang ua awlawl a tanchinhoih genpihthei panta ahihman un kipahhuai i sa mahmah hi. Tanchinhoih genpih a omte a lohchinna ding pen Pathian khut a om ahihman in Pathian kiang ah thum in ngen ni.

H. EBC MISSIONS CENTRE:

1. EBC Guwahati Missions Centre pansan a semtu Pastor T. Pauzalian leh Evan. Suanboy Vualnam, Office Assistant a semtute'n Pathian ompihna toh chidam in sem zom thei zel uhi. Pathian ompihna tang a gahsua semtu hong hih theihna ding un thumna in phawk ni.
2. Pastor T Pauzalian, Guwahati kiim a sem ding a mohpuakna piak a om ahihbang a munthak leh gamtatna thak a gamta ding ahihna ah Pathian kha ompihna tang a chidamtak a hon sep theihna ding in amah leh a innkuanpihte thumna in phawk ni. ■



CHILDREN'S *Corner*

NAUPANG NEUTE SINSAK LEH HANTHAWN DINGDAN

Naupangte khalam ah i kep piching theih na ding in, a neu ua kipan Sunday School hoihtak a akai touh uh a poimoh hi. Naupang khat hoihtak a Sunday School a kai suak nak leh Pathian hehpihna toh a khalam dinmun huai hunsung mah in bawlfel man hi. Tuailai hun a i khahsua a tamzaw te naupang hun a Sunday School hoihtak a ana kaisuak lou te ahi tangpi uhi. Naupang te Sunday school hoihtak a a kaisuak touh theihna ding un, nu-le-pate banah Sunday school sinsaktute'n mohpuakna lianpi kinei hi. A biik in naupang neu chikchikte tulai hun toh kituak a sinsak leh hanthawn dan i siam a poimoh a, kum 14 ahihtan bang uah Sunday school kai a poimohna leh kai teitei ngai ahihdan a lungsim uah chii i tuh khit a poimoh hi. Huaiziak in amaute hanthawn leh sinsak theihdan tampi omthei lakah bangzah hiam i gen ding.

I. LAISIANGTHOU A MITHUPITE TANGTHU SINSAK DINGDAN:

Laisut mite gendan in Bible a tangthu hilhdan hoihlou leh diklou pen tuh, hunteng a paidan kibang a tangthu hilh ahi. Heutute theihdia poimoh mahmah khat ahihleh Bible sung a tangthute sang a tangthu dik leh lunglut huaizaw omlou ahi, chih naupangte theih sak ding ahi. Hiai lungput neihna ding in heutute mohpuakna lian mahmah hi. Amaute, a biik in naupangneute'n lunglut tak a ngaihkhiat theihna ding un, genthoh chih banah a lunglutna uh su thathoutu dingin Flash card/Milim gelh tawm/a lem tan na ah Power point te zangin sinsakthei leng pahtuam mahmah hi. Huai banah, Laisiangthou sunga tangthu (Bible stories) himhim naupangte i sinsak chiang in, huai tangthu tungtawn a Pathian thupina, a thilhihtheihna, a muanhuaina, biak leh belh ding ahihna a daw k teitei ding ahi. Etsakna in *Samson tanchin na hilh leh- Samson a sam a sau leh hat, a sam a tom leh hatlou chih tankia hilou in, Samson in Pathian thu manga, a sam a hawi leh hat, Pathian thu bang hilou a asam tansak a omleh hatlou*. Huchi mah

bangin, Laisiangthou sunga mite Tanchin i hilh chiangin, huai mite tungtawn a Pathian thilhih amuh ding uh ahi.

II. BIBLE TANG SINSAK THEIHDAN KHENKHATTE

a. Blackboard/ white board: Bible tang pen black board/white board a gelh khe ding, a thumal tamlou lou a nulmang ding in a thumal kimlou te gensak ding. Huaikhit chia a bible tang teng gensak vek ding.

b. Akaih bawl a sa ding: La kaih bawl a bible tangte sak pih ding. A kaih pen phuahtawm theih ding hi.

c. Naupangte dingsak ding: Naupangte puannak rong uh dungzui a dingsak ding leh bible tang pen gensak ding. eg. a hing silh tengteng, a vom silh tengteng, a sam sau tengteng, atawp a a vek ua a din theih teitei nang uh khat ngaihtuah a dinsak vek ding. Eg. Anne sa a hong kuan tengteng.

d. Volume control: Sinsaktu in a volume control ding, a khut a lik sang Chiang a naupangte'n bible tang pen a ngaih a gen ding uh, mai toh kituak a khut a hon lik Chiang a awl deuh a gen ding, a niam a akhut a hon koih Chiang a awl gen ding uh. Hiai pen sinsaktu'n Bible tang genlai a a ut hunhun in akhut lik sang in lik niam thei hi.

e. Awl sak haihiai (Tone it down) ding: Bible tang pen a ngaih a genpat ding, awl sak deuhdeuh ding, a tawp a hu khah lou a gen ding.

f. Ball ki pass kawm a Bible tang sin: Naupangte dingkual sak inla, ball/balloon hiam ki pass kawm in Bible tang genpih in. Na Bible tang gen uh a bei Chiang in a ball/balloon tawi kha penpen in a bible tang pumpi in genzel ding ua, banghiam chi a a mau kia a agen ut kei ua leh a lawm ding uh a zot uh phasakpih in.

III. BIBLE TANGTE REVISE DAN: Hiai ahihleh Bible tang theihstate revised na ding in zatheih hi. Balloon sung ah lai dal in Bible bung leh tang na gelh thun inla, huaikhit Chiang in mutpuak inla naupangte kiang ah huai balloon a deih penpen uh dawtkek ding in hilh in. Huai a balloon sung a bung leh tang om penpen huai naupang in gen ding hi. Naupang in amah kia a gen a ut keh a lawm ding a zot phasakpih in.

Na hihpeuhmah uh mihing tung a hih hilou in, Toupa tung a hih bang in lungtang tengteng mah toh sem un. Toupa Khrist nasem na hih man un Toupa a kipan kipahman a goutan sang ding na hi uh chih thei un. Kolossa 3:23,24

Hiai a tung a te zuitheih sawm a hamphatpih ding in Toupan hon ompih chiat hen. ■



EBC Innsung Thu

BETH HARAN HOSTEL TOH KISAI

Thupatna: Beth Haran Hostel Ministry toh kisai kalsuan thei zel a honpi Pathian kiangah Thupina leh Pahtawina ka pia masa hi. Beth Haran Hostel kichi I Saptuam Nasemtute tate laisim a koihtheihna dinga Hostel kibawl leh mun poimoh tak ahi. Semtu khatpeuh in sepna mun a tate school/College kai theihna ding lemtang louten hiai Hostel a koih a, lungmuang taka a Toupa gamna septheihna ding ngimna a kum 2016 vel akipan hiai Hostel Ministry Saptuam in a bawlkhiahi. Tuni chiang in masawn tou zel in Naupang tampi takten phattuampih ta uhi. Tuleh in Naupang 21 om a, Warden nih leh ann-huantu/cook khat in enkol a, tua banah Chaplain in, apoimoh bangin khalam nasepna leh kisinsakna hun hong zatpih zel hi. Hiai Hostel ah i saptuam nasemtu kuapeuh in seat awng omdan zil in tate koih theih gige hi. Hostel a omthei dingte mahni kikem thei chiang Class VI –XII tan ahi tangpi hi, himahleh, seat omdan zil, leh heutute lemsakpihna toh College Naupang leng apoimoh bangin om thei hi. Amun nuam in thoveng mahmah a, a mu nuam mite a dingin chiklaipeuh in phak theih gige ding hi.

Kikepdan tangpi: Niteng hun zeekna (*time Schedule*) kichian tak bawl ahi a, Zing thoh hun apan lup-hun tan dong in kikalsuanpih hi. Atangpi in nikhat in Naupangten dakkal 6 sung laisim theihna nei ua, a kuhkalte a ding in hiai sanga tamzaw hun kibawlsak hi. Zingkal Devotion, Biakinn ah kipaipih a, nitak lamin Devotion Program kineihpih gige hi. Hiai hun ah Lasak khawmna, thugenna, thumkhawmna, motivation talk etc chihte kalkhat hun in program item ah kizang touzel hi.

Activity khenkhat: Chaplain toh kithuzak in Year Plan kibawl zel a, heutute/board in approval honpe zel uhi. Kum paita in gamsung buaina ziakin duhthusam bang in plan pai thei vek kei mah leh Evangelistic program, hostel Outing, Advent Christmas leh Parent's Meet chihte nuamtak in kizang hi. A kallak in mipil-misiam dottham zaw khenkhatten naupangte sinsakna leh thuhilhna (*Career Guidance/Motivation talk*) poimoh taktak hong neihpih zel ua, manpha in nuamtuum mahmah hi.

Building toh kisai: Beth Haran Hostel Building lian, Siangthou leh kilawm mahmah ahi a, E-Shape a kibawl ahi. Anawl tuak ah Numei leh Pasal giahna (*dormitory*) om a, alai ah Dining Hall leh Study Hall liantak om hi. Tuisiang dawn ding kiching om hi. Kemtu (*warden*) te leng tua building mah ah om uhi. Tuateng banah tulel in, heutute lemgelna leh awlmohna ziak in Hostel Building extension bawl lel ahi a, luahteih pah lamet ahi. Tulel a Naupang omte banah Naupang 20 vel mah omtheihna ding a ngim ahi. Session thak (*2024-2025*) a om nuam/ naupang omsak nuam semtu nu-le-pa kuapeuh in Admission a bawl theih ding a, a bawl masa seat ngah masa (*first come first serve*) ahi ding hi. Huan, tu a kizang lel naupangte fee hiai anuai a bang ahi:

- ❁ Admission fee: Rs. 2000/- per head (aomsung set ding)
- ❁ Mess fee: Rs. 2000/- per head per month (Khat sang a tamzaw omte Rs.500 discount kibawl hi.)

Thukhitna: Hiai banga tate koih theihna ding Hamphatna hon bawlsak heutute tung ah kipahna lian mahmah a, Semtute kuapeuh tate akoih **nuamten** hamphatna tangthei ding hi. Huan, hiai Hostel kalsuanna toh kisai Pathian pina **tampitak** muh ding omta a, maban ah leng Pathian pina mah poimoh lua kisa in, hundangte banah **Nilaini teng** in Hostel ading biik in Thumna ka neizel uhi. Simtu leh deihsaktu kuapeuh mah in thumna a non phawk zel uh kon ngen uhi. Theihbeh ut neite a ding in hiai Wardente Contact number tungtawn in kan theih gige ding hi **Mb. no. 8119979943 or 8731958127** ■

WOMEN OF EXCELLENCE CONFERENCE A KIHEL UH:

Dorcas Coordinator Nemngaihawite leh Heutunu Chingbiakmawite January 29-February 6, 2024 sung SAIACS ah Women of Excellence Conference Bangaluru ah va tel uhi. Hiai hun a resources person te siamna sang taktak nei himahle uh, mi kingainiam, kipezou leh Pathian it mahmahte hi ua, amaute hinkhua mahmah in leng hanthawn mahmah ua. Laisiangthou a Esther hinkhua tungtawn in Resources personte'n sinsakna pia ua, manpha leh punna tampi toh hongtung kik uhi. Pathian in mohpuakna hon piak bangbang thumangtak a sepkhiak ding i mohpuak ahihdan leh tuate hangsan tak a sepkhiak ding ahihdan leng va mu uhi. ■



Ordain Sunna

1. Min: **Rev. KHOINAIJAM IBOBI SINGH**
2. Pianni: January 01, 1948
3. Pianna Khua: Phoijing Chingmang, Nambol, Manipur
4. Pianthak Hun: April 01, 1977,
5. Baptisma: July 10, 1977
Baptistu: Pastor Seilep at Kangchup Chingkhong CRC Church
6. Pa Min: Kh. Pishak Singh
7. Nu Min: Shyama Devi
8. Zi min: Leichonbam Sobita Devi
9. Kitenni: December 28, 1981
Kitengsak tu: Ningthoujam Noyon (Khawlkhojam)
10. Gil a gah goutan neihzah: 5 Pasal: 5
11. Tulel a omna Saptuam: MEBC Nambol
12. Tulel a kizatna: MEBC Nambol member
13. Ordain Kum: December 4, 1986
Ordain Petu: Rev. T Jamkhothang
14. Pahtakna lai san kum: December 2013
15. Toupa kiang a tawldam ni: February 4, 2024
Vui ni: February 4, 2024
16. Vuitu Pastor & Saptuam: Pastor Manglemba, Nambol, Manipur
17. A tanchin gelbeh nop:
 - 1) January 1982- February 1985: Wangkheira (Chandel District) SEMACA (South East Manipur)
 - 2) February 1985 – February 1998: Phoijing Nambol.
 - 3) March 1998 – January 2001: Thamnapokpi
 - 4) January 2001 – September 2001: Phoijing, Nambol
 - 5) October 2001 – February 2003: Sugnu Wapokpi
 - 6) 2003-2005: Thiyam Konjin
 - 7) 2005-2011: Sugnu Wapokpi
 - 8) February 2011 – December 2013: Phoijing, Nambol
 - 9) Counselling Piakzah - 3480 People
 - 10) Pianthak sak zah - 374 people
 - 11) Baptism piak zah – 135 people
 - 12) Kitenna sai zah - 14 couples
 - 13) Naulat zah – 296 Children





Kipahthu Genna THUMNA MAKAI

MARCH 2024

- 1 SINTAWPNI:** Khathak a honpi galkai Pathian tung ah kipahtu genni. Tuni a kipan ni 3 tan daih ding EBCC Thanlon ah Evan. N Thangsuanpau leh Sawltakte'n Chialpina nei ding uhi. Director of Missions leh General Secretary EBC in Himalayan field vehna ni 8 tan nei ding uh. February 29- March 2 sung LND in makai Camp ORC ah nei ding uh, amaute thumpih ni.
- 2 KIGINNI:** Tuni leh zingchiang in Rev. M Ginminthang in EBCC Bangalore ah BCD Sinsaktu Orientation leh BCD Motivation hunzang ding, manpha leh lamzang tak a kizatna ding in thumpih ni.
- 3 NIPINI:** Dorka Pawl project DotProj a puankhui zil ten tukha in graduate ding uhi. A zilsate uh manpha a akizat theihna ding in thumpih ni. Tukha ni 19 in batch thak ding lakna om ding ahihman in thumna ah delhzui ni.
- 4 SEPPATNI:** Zingchiang a kipan in i Saptuam schoolte lutnawn ta ding uhi, sinsaktu leh sinlai naupangte Toupa makaihna leh ompihna ngen in thumpih ni.
- 5 SEPNAWNNI:** Zingchiang a kipan in date 10 tan daih ding EBCC Teikhang ah Pasal Camp om ding a Evan. T Damkhothang leh sawltakte kithuah ding uhi, camp gahsuaah leh lohchinna ding in thumpih ni.
- 6 NILAINI:** BCD Sinlai bu Project nasepna paizom zel in tuni chiang in Beginner-Junior kum 2na laibu dingte leh Intermediate leh Senior sinlaibu kum 1na te bawl na pai lelle hi. Hiai sinlai bute e tungtawn a naupangte a phatthuampih theihna ding un thumpih ni.
- 7 NINGANI:** Tunitak in LBC Lamkatung ah Rev. V Thangkhanmuan in Tuailai kikhop leh TBYP Committee te toh kithuahkhawmna hun zang ding, kithuahkhawmna manpha ahihna ding in thumpih ni.
- 8 SINTAWPNI:** Zingchiang a kipan nipini tan daih ding EBCC Mumbai in Saptuam 9th Anniversary leh Departmental Orientation program nei ding ua Rev. Nenglian Vualnam DD in hunpi zang ding, zingchiang in DBDC/LND saina in Division sung a kum 70 tunglamte Fellowship neihpih ding ua, Rev. Ginmalsawm DS/LND in hasotna hun zang ding, amaute Pathian khasiangthou kithuahpihna ngen in thumpih ni.
- 9 KIGINNI:** Division thak bawlkhiaik ding toh kisai nasepna paizom zel, lamzangtak a a saitu leh heutute hon sai theihna ding in thumpih ni.

10 NIPINI: Tunitak in LBC Lamka Tung ah Rev. K. Kamchinkhup in Missions Motivation hun zang ding, Pathian khasiangthou kithuahpihna ngen in thumpih ni.

11 SEPPATNI: Zingchiang a kipan date 16 tan EBCC Central Lamka in Numei Hotdamna Camp nei ding ua, Rev. K. Kamchinkhup leh Evan. Upa Lianding Guite thugentu in pang ding, camp manpha leh gahsuah ahihna ding in thumpih ni.

12 SEPNAWNNI: NDPN vaisaina tuni tan in bangtan hiam kisai ta maban ah leng kisai zom tou zel ding ahihman in lamzangtak a mi tamtak in a phattuampih theihna ding in thmna ah delh zui zel ni.

13 NILAINI: Zingchiang a kipan date 17 sungteng EBCC Immanuel Hqtr Veng in chialpina program zang ding ua Evan. N Thangsuanpau in hunpi zang ding chialpina manpha leh gahsuah ahihna ding in thumpih ni.

14 NINGANI: Zingchiang a kipan in BSEM nuai a pawl X ten exam panta ding uhi, chidam tak a exam hon zohna ding uh leh exam sung gam buaina ziak a hih buai a omlouhna din thumpih ni. DORCED nuai a naupang kichawm lel te leng class X, XI, XII Exam ding om ahihman un thumpih ni.

15 SINTAWPNI: Tuni a kipan in 17 tan daih ding EBCC Takvom in chialpina nei ding Evan. T Damkthohtang thugenpi in pang ding, chialpina gahsuah leh lohchinna ding in thumpih ni.

16 KIGINNI: Pathian hehpihna toh sumkum (Financial Year) bei ding

hita i budget Hqtr, Division leh local te a tungzoulou tampi ommah leh bangmah haksatna omlou a masawn theihna ding in thumna ah phawk ni.

17 NIPINI: January 31 in GBC a clerk sem Khamzapau a sepna a pan khawla, zingchiang a pan in GBC Principal Rev. Paukhanmang Guite leng khawl ta ding, Pathian vualzawlna toh pension tan a semthei uh ahihman in kipahtu gen in a mailam ding uh thumpih ni.

18 SEPPATNI: Zingchiang apan date 23 tan daih ding EBCC Singngat in ORC ah pasal Camp nei ding uhi. Hiai hun in Evan. T Damkthohtang thugentu in pang ding, Camp vaisaite, camper te leh thugentu te Pathian khasiangthou kithuahpihna ngen in thumpih ni.

19 SEPNAWNNI: Tulel a Pastor candidate a omlol leh sawltak a kizang mi 4 te tulai in Evangelist te toh kithuah in program zang in zinkual den uhi, chidamna leh lamzangtak a hongpai zom theihna ding in Pathian khut a kemsak in thumpih ni.

20 NILAINI: Gamsung buaina in naktak in hon nawkkha mahleh tunitan in semtute kha loh ding kipe thei zel ihihman in kipahtugen in semtute'n leng naktak a hon sep theihna ding un salma leh khalam Pathian ompihna ngen in thumpih ni.

21 NINGANI: Tunitak in EBCC Zehang lamka ah Rev. V Thangkhanmuan in Tuailai kikhop leh TBYF Committee te toh kithuahkhawmna hun zang ding, kithuahkhawmna manpha ahihna ding in thumpih ni.

22 SINTAWPNI: I Saptuam school a semtu teacherte salam leh khalam leh inkuan a chidam tak naupang te itna toh kem a sinsak leh makaih theihna ding un thumpih ni.

23 KIGINNI: CES Manual 2023 EBC Khawmpi Lian 2023 in a pom toh kiton in Saptuam school policy kithehsiamsakna Division level ah pailé manpha tak a zat ahiththeihna ding in thumna ah delh zui ni. Zingchiang Palm Sunday in EBCC Central Lamka ah Rev. Ginmalsawm thugenpi in pang ding thumna ah phokni.

24 NIPINI: Tuni in Saptuam chih in Palm Sunday zang ding hi, EBCC Suangdoh a Rev. K. Kamchinkhup in hunpi zang ding, Rev. Thawndoulían in LBC Lamkatung ah hun zang ding, Rev. Nenglian Vualnam in EBCC College Veng ah hun zang ding, Evan. T Damkhotang in Singngat ah zang ding amaute Pathian khasiangthou kithuahpihna ngen in thumpih ni.

25 SEPPATNI: Beth Haran Hostel a semtute tate naupang 20 ding bang om uhi, a tamzaw omna ding building kibawl lel lamzangtak a zoh khiak ahiththeihna ding in thumpih ni. Huai a naupangte enkoltu Sir Thangzam, Ms. Manhoihkim leh Chaplain Pastor Thangbiakmuang-te thumpih ni.

26 SEPNAWNNI: Convention Book House in tuni tan in masawn tou zel, vanzat tuamtuam leng puahphat in om toutou, semtu Manager Mangthianlal Samte leh a seppihte thumpih ni.

27 NILAINI: Good Friday leh Easter Sunday hunte ah EBCC Shillong ah Rev. Nenglian Vualnam in hun zang ding hiai toh kiton in Department Orientation hun leng zang ngal ding uhi. Pathian khasiangthou kithuahpihna leh ompihna ngen in thumpih ni.

28 NINGANI: Evan. N Thangsuanpau in tuni in EBCC Daido ah hun zang ding, 29-31 tan EBCC North East Tlangnuam ah chialpina program zang ding Pathian khasiangthou thopna leh ompihna ngen in thumpih ni. Tunitak in EBCC Moria ah Rev. V. Thangkhanmuan in Tuailai kikhop leh TBYF Committee-te toh kithuahkhawmna hun zang ding, EBCC LBC ah March 29-31 (Good Friday - Easter Sunday) sung Rev. Ginmalsawm, DS/LND thugenpi in pang ding, amaute Pathian khasiangthou kithuahpihna ngen in thumpih ni.

29 SINTAWPNI: Tuni Good Friday a kipan in 31 tan EBCC Khominthang ah Rev. K. Kamchinkhup leh Rev. Thawndoulían in College Veng ah hun zang ding uh, amaute thumpih ni.

30 KIGINNI: LRRC Lametnamun a khamtheih hih kibawl hoih ut i kepte thumpih ni. Lamka North Division in konglai a khamtheih ziak a mawk om te kaikhawm in Lametna Mun ah kem ua, huai ah Pathian thu in Division sung a DS leh Pastor-te kithuah in pi uhi. Sa leh kha a suahtakna hon muhna ding un thumpih ni.

31 NIPINI: Tuni Easter Sungday in Rev. Thawndoulían in College Veng ah hun zang ding. Tuni kha beini tan a honpi Toupa kiang kipahthu gen in isep khelb bawl khel omte ziak in thupha tawi ni. ■

Postal Regd. No. MNP 07 | Regd. No. 22344/70

BOOK POST

If undelivered, please return to

The Editor,
KCHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



JOHAN 12:13

Tumnahte a tawi ua, dawn ding in a pawtkhia ua,
Hosanna, Toupa min a Israelte Kumpipa hongpai a
hampa e, chi in, a kikou uhi.

Edited & Published by Rev. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006